



荔軒草者侍中曹子清詩集也子清門第國勳長
江南佳麗地束髮即以詩詞經藝驚動長者稱神
童既舞象入爲近臣今始弱冠而其詩清深老成
鋒穎芒角篇必有法語必有源雖顛白齒搖拈鬚
苦吟不能逮其一二可不謂竒哉不佞徵車來長
安晤子清如臨風玉樹談若粲花甫曼倩待詔之
年腹嫻嬛二酉之秘貝多金碧象數藝術無所不
窺弧騎劍槊彈碁擘阮悉造精詣與之交溫潤伉
爽道氣迎人予益歎其才之絕出也蓋才之出于
天者自然而莫知其所至學焉而莫能企及焉故

其于詩有可學有不可學鑄格鍊字揚藹圪藻此
可以學得也亭臯木葉池塘春草此不可以學得
者也以絕人之姿加典學之力及其成就豈有量
際哉昔子建與淳于生分坐縱譚蔗杖起舞淳于
目之以天人今子清何多遜也李白贈高五詩謂
其價重明月聲動天門即以贈吾子清海內月旦
必以予言爲然已未四月朔黃公顧景星書于都
門旅次

與荔軒別五年同學者以南北爲修塗以出處爲
戶限每搔首曰荔軒何爲哉既而讀陳思仙人篇
詠閭闔羨潛光乃知陳思之心即荔軒之心未嘗
不爽然自失焉徂歲荔軒寄舟中吟一卷讀之如
對謦咳欠伸而握手留連也蓋至今日始得敘曹
子之詩詩者曹子不可須臾離者也曹子以詩爲
性命肌膚於是導之引之抑之搔之輾轉反側恒
有詩魁壘鬱勃於胸中此精微爛金石視陳思何
異哉昔吾與論詩有才焉有學焉有識焉三百篇
之採風彤弓湛露棧車幽草榛苓茗華莫不有詩

經聖人排纂如出一手與觀羣怨合而多識鳥獸
草木渾鎔無跡四始分而君臣上下房中郊廟燦
若列眉非好學深思絕利一源者孰知之嗟乎起
陳思於今日吾恐不過如蔦蘿之松木寒號之不
凡而已荔軒知之宜乎不可須臾離詩然有說於
此雍丘之贈友也有劉楨王粲丁應爲唱酬有白
馬彪爲友于其求知已易易耳今曹子二千里外
寄訊於予如魚山天樂寫爲梵音此予所以欲箋
釋要眇爲之旁皇撫卷而不能已也荔軒之竒懷
道韻又寧獨才學識而已乎昔人品詩謂建安齊

梁諸才人皆有君子之心焉請以相曹子庶幾孟
氏誦詩知人之旨使徒賞其詩淵淵爾鏘鏘爾非
曹子所以命予者已些山學弟杜芥書時年七十
有三

言者心之聲也詩之爲言則尤出于心之自然而不可以模擬依傍者也荔軒先生家世通顯爲天子親臣乃被服儒素黽勉盡職不涉戶外一事故發之爲言蒼然以樸澹然以雋悠然以遠無論逐逐于歷下竟陵不屑闖其藩籬即以眉山劍南爭位置者自先生視之不啻如避秦人不知有漢無論魏晉焉獨是古今咏物無不以用意爲工如鄭鷓鴣袁白燕之屬字字刻畫以此得名而集中咏物諸作若在有意無意之間使人一唱三歎而始遇之則自少陵促織詩所謂久客得無淚故妻

難及晨外不能多覲也而人猶欲以模擬依傍相求焉得乎遂太息而弁言其端遂安毛際可撰

杜子美言詩語不驚人死不休韓退之言詩橫空盤硬語妥帖力排冪而白傅期於老嫗都解張子厚云致心平易始知詩陸務觀云詩到無人愛處工羣賢之論若杓鑿之不相入者然其義兩是亦就體制分殊爾今之詩家空疎淺薄皆由嚴儀卿詩有別才非關學一語啓之天下豈有舍學言詩之理棟亭先生吟藁無一字無鎔鑄無一語不矜竒蓋欲抉破藩籬直闕古人窾奧當其稱意不顧時人之大怪也先生於學博綜練習掌故胸中具有武庫瀏覽全唐詩派多師以爲師宜其日進不

已譬諸鬪騶驥駉郭椒丁櫟騰山超澗馳騁既熟
下而縱送劇駿之區其樂有不可喻者已康熙乙
酉冬十月秀水同學弟朱彝尊書

詩自明初至今幾於四變洪武四家尚矣空同歷
下其失也浮竟陵矯之其失也細今則家稱韓白
變而南宋其失也狃甚而爲俗矣棟亭諸咏五言
今古體出入開寶之間尤以少陵爲濫觴故密咏
恬吟旨趨愈出七言兩體胚胎諸家而時闌入于
宋調取其雄快芟其繁蕪境界截然不失我法此
是其工力到家然非其天分過人氣格高妙亦不
能驅策古人爲我之用也歎賞之餘謹跋其後四
明教弟姜宸英

肥城東門外

搶灘東門外

吳江門外

宋國門外

古今詩話

古今詩話

古今詩話

古今詩話

古今詩話

棟亭詩鈔目錄

卷一

坐弘濟石壁下及暮而去

宿來青閣

夢春曲

春日過顧赤方先生寓居

讀梅耦長西山詩

卧龍嶺

曉遊潭柘寺

不寐

人日和子猷二弟仲夏喜雨原韻

射雉詞

葛漁城

趙北口

病中吟

懷高澹人學士

胡進也木孩將移居南城

讀施愚山侍讀稿

杜些山胡靜夫過訪

雪霽次些山韻

留別姚後陶

花笑軒步月留別蒲菴

黃河看月示子猷

北行雜詩

南池

臨清聞聽水

喜葉桐初至

一日休沐歌

五月十一夜集西堂限韻

送桐初

古北口中秋

涼夜不寐口占

程霽堂至詩以慰之

秋飲

過陳次山寓居讀迦陵稿有感

圓廬

田梅岑自南城來却贈

題杜亮生釣竿吟

十八夜對月與子猷作

題次山小軒和姜萬青韻

和程令彰十八夜飲南樓

聞雁

送亮生南還即和留別詩兼寄些山先生

些山有詩謝夢奉和二首時亮生已南旋

四月望夜得遲字

呼盧歌

飲漚酒

仲夏吳雪蓬自土木歸見枉有作

月涼茗飲歌

送程正路之黃陂丞兼懷赤方先生

併菊

插併菊夜供有感

咏後陶香爐

咏桐君木枕

咏次山藏劍

咏上若澄泥硯

冲谷四兄寄詩索擁臂圖並嘉予學天竺書

月夜書懷

小軒闢除已移居其中有懷子猷

西堂飲歸

南軒種竹

棟亭詩鈔卷一

千山曹寅子清謨

坐弘濟石壁下及暮而去

我有千里遊愛此一片石徘徊不能去川原俄向
夕浮光自容與天風鼓空碧露坐聞遙鐘冥心寄
飛翮

宿來青閣

襍被香寒夜氣濃五更月出海門紅愁人偏聽荒
雞唱烽火無邊歸夢中
曉起千峰霧不開怒潮捲雪蔽天來安能滿挽水

犀弩直射山陰白馬回

時馬寇
猖獗

夢春曲

鴻雁歸矣可奈何春月脈脈生微波樓船萬石臨
中河飲酒逐景歡笑多翠袖出簾露纖手綠鬢紫
蘭夜香久寶瑟聲寒漏未央及春行樂猶恐後月
落長河白烟起美人歌歇春風裏夢轉微聞芳杜
香碧盡江南一江水

春日過顧赤方先生寓居

見因季子到堦前堂上先生尚晏眠逆旅藥香花
覆地長安日暖夢朝天開軒把臂當三月脫帽論

文快十年即此相逢猶宿昔頻來常帶杖頭錢

讀梅耦長西山詩

西山亘千里水石相絡繹結脈到幽州不盡迴蒼
碧眷彼高人駕一往空今昔杖履凌雲巔行歌弔
龍宅幽懷以竒騁佳境自茲闢我誦殘春篇慨焉
歎行役風露卧中宵車馬日枕藉愧與名山鄰羞
踐世人迹鬱鬱黃塵間狂吟聊自適

卧龍嶺

塞山如蛾眉雨洗青蒙茸我來值六月石路盤高
峰清風掃殘雲明霞淨秋容窈窕入無際望之開

心胸回首見長河波濤正洶洶晝夜逝不息車馬
紛交衝惜茲白日晚悵望撫孤筇

曉遊潭柘寺

諸峰雲未開前途馬已駕逡巡飯行人縱覽忘深
夏幽光蒙青林輕陰散丹榭古跡不可追依稀見
殘柘坐聞流泉哀百折空亭下

不寐

月落林屋暗寒燈耿幽光鄰雞私呷喔冰聲裂方
塘既醉復思夢神清愁亦忘曉車如秋潮雷鳴過
空堂塵役苦無厭俯躬自徬徨

人日和子猷二弟仲夏喜雨原韻

小閣昔年聽雨處夜闌燈火對牀明草魂未返江
南夢雁字初歸人日晴屈指炎涼千里別何時來
往一身輕釣車秧馬南郊外共看靈湫徹底清

初夏游烏龍潭為盛事

射雉詞

少年十五十六時關弓盤馬百事墮不解將身事
明主惟愛射雉南山陞山南麥熟不得實青黃初
接已生摘山田久旱無人耕老雞叫媒白晝行隴
頭峩峩行且舞隴下絳冠力如虎不惜二雄為雌

死但言新試銅牙弩

葛漁城

清秋埜色曠遊子不能止
落日下高原驅車見墟
里萬柳一煙靜淼湖中水
湖水清且連造酒醇而旨
烹此留底魚食彼場上米
孤雲澹無營飛鳥相與徙
騁目悅初心暢悟達生理

趙北口

下馬問舟子手指籬邊舟
惠肯涉印否不遠到前
洲前洲多楊柳後洲鳧與
鷗印能操長楫擊汰向
中流水光浮上天羣魚入
空游惜無百尺絲繫此

一寸鉤野女見人咲秋草
吹綠油回身感旅宦轅
轍何時休

病中吟

風梳病髮纔盈握藥畏寒
梅香繞廬飢雀噪簷山
雪減凍蠅觸紙午窗虛

懷高澹人學士

危坐瞻鴉夕穿雲有數層
暮塵窗外海寒月定中
僧易痼文園病曾分蕭寺
燈相思常不見清冷玉
壺冰

胡進也木孩將移居南城

月沉風乍勁，撼屋一如舟。盡作懵騰睡，真成汗漫遊。
驚沙連廣漠，冷焰合蕭丘。來往寒城下，還能爲酒謀。

讀施愚山侍讀稿

疇昔攜尊處，斜陽依舊過。匡時聞大略，絕筆想餘波。
歲月窮經史，衣冠夢薜蘿。九原皆故舊，涕淚幾人多。

杜些山胡靜夫過訪

坐訝分牀慣，跣趺不異僧。清歡唯故塵，久約亦寒燈。
柝冷司人唱，尊餘釀者矜。長街何以贈，霜月白。

稜稜

雪霽次些山韻

春城人未着春衣，玉塔微瀾半夕暉。桃葉有情依舊凍，
梅花無主不須歸。盤風雛鷓懸鈴出，闕雪寒蛾應火飛。
能是風流任來往，五陵從此盡輕肥。江山何許未彫殘，
啾唧牆頭有紇干。十日歸鴻迷建業，萬行疎柳夢長安。
花燈雜路迎春色，酒幟排空起暮寒。寄語羣兒休踏盡，
好留明月盡情看。

留別姚後陶

塞草江蘆青不同，浮生何限別離中。雄心作達深

杯見老眼題愁素紙空
巷北樹涼扶杖過溪南
水好放船通相於正有
園居約多送蒲颿八尺
風

花笑軒步月留別蒲菴

獨行沙岸白江月逐人
清細柳隨潮活危磯到
寺平鐘聲塵外夢花笑
靜中情回向知何日風
前惜此生

黃河看月示子猷

高春澹微景露坐思南
園不知明月光已照檣
尾旛濁浪無時休逆旅
如煩寃怡然把瘦骨奮
起憐吹墮涓涓瀉醇酎
秩秩羅寒燔視子負竒
氣聽我

播清言清言亦可飽萬
古多續緇惟此白玉鉤
能探崑崙源常儀惜輕
垂碧靄滋餘暄豈鮮重
淵龍睥睨方蟠蜿亦有
投林鵲素色含孤鶩秋
空自然遠蟲候本相喧
明明一勺水再顧失潺
湲陰森浚九地晃朗排
三垣荒風括箕口細露
灑高原與子共此杯持
身慎璵璠莫歎無榮名
要當出籬樊

北行雜詩

野艇方離雨城隅花出
欄一羣紅不賤六月水
初寬泥飲新荷葉叢歌
舊棗竿猶憐波上燕未
及渡江看

微咏倚疎竹風清歌窅如開門飛白鴿彈指出朱
魚衣色迎涼改杯香近客徐無才甘飲飫茫照兩
躊躇

浮生常不達霍霍視頭顱倚棹思千古迎風灑一
壺竒雲臨楚散修竹到淮無漁笛如知己憑陵爲
客呼

青旗來粵甲黃馬盡吳船魚麗難爲水蟻行不出
天人濤爭達旦神鬼雜多年截地曾無術蒼涼燈
火前

風水逆相關湖河乘間流幾時青黑土一夜白黃

頭勁翻摩霄退殘花觸石浮悠哉年少日安穩縱
驂騮

日氣挾飛燕蓬窗晚食時關河淒欲斷鉦鼓競相
持節候風來早鄉心馬去遲不眠空翦燭已照鬢
成絲

水鳥啼中夜朱霞晃一朝轉看婁亮舫清共許由
瓢秋草深何有寒城近不囂愁心與襪襪日日飯
魚苗

落日桃源外憑高一欠伸天河何必險塞雁不來
賓禿樹縵綠鳥平灘負戴人難將青草淚萬里問

蒼旻

過淮聲不斷八月竟無聞殘夢連風葉空城滿夕
曛人寰清可繼蟲介隱多文更欲芟秋草螳螂漫
合羣

泊腐無情化秋來似有心隨風多隱見濯浪不浮
沉萬里寒孤幔雙星帶一簪於斯將照乘得得慰
歸吟

楚蛩如恨客卧穩楸頭船白露看成霰青莎合共
氈更長蟾不進秋好蝶難翩送爾天西岍支機織
女邊

飄零雙鳳子顛倒着黃衣不散交鬚戲遙憐並體
飛雲香高冉冉波照落微微滿眼天涯草西園幾
日歸

蛾眉不自愛撲暗一蓬燈火猛何如吏心安即是
僧寒思銀色界白勝研光綾欲就纖纖月黃河浪
幾層

殘梧澆濁浪滾滾散清愁蟲鳥誰先得蛟龍難共
遊洪音趨下土素景逼高秋寥濶存真賞空餘百
尺樓

層陰孤月出返照下邳城去路秋將半思家眼倍

明齊波青玉色越櫓白鵝聲滿坐滄浪客從誰借
酒兵

齊魯語不辨城村時一經秋陽暴衣白晚棗墮船
青漸喜無蠅蚋相看有鵲鴿地圖還共指直北建
高瓴

粉榆不知社食肉媿儒冠朔曆看來少家書寄到
殘拂波無一燕落日倚孤灘

行在天山外西風玉帳寒

濟水寒無滓空多縮項編網眾充下澇城郭冒高
煙曉食觀須曠秋山坐不偏猶傷髀裏肉三月柁

樓前

同舟無主客歌泣不知頻塵面由來假秋光即此
真雲霾深地肺虎豹據天津明日黃花外萸囊意
倍親

野風吹側帽斷岸始登高闊絕無鴻雁提攜有桔
槔清寒蕎麥氣哀響白楊號掩淚看孤弟西山思
鬱陶

南池

滄海橫流亦有時紅塵今見古南池青天秋老無
人問九百年來八句詩

臨清聞聽水

無心噴礴亦昏晨
置爾歎崎磊落人
風角哀湍多
順耳船頭明月不
回身寒歸瀚海
年年淺秋入茅
簷事事新一悟
浮生燈影是彈冠
猶惜故鄉塵

喜葉桐初至

馬耳飛塵脫帽逢
眼中羸秀舊時容
詩惟滌穢囊
如洗温不增華客
是松乾鵲窺簷先
下直晴山照
市未高春坐來翻
灑傷心淚四月孤
亭棟影濃
論愁不厭亦天真
塵滿匡牀月滿身
已分雲霞成
過客漫將屠釣勸
間人文章光焰思
前輩冠蓋風

華接後塵從此預
饒休沐暇與君唯
有甕中春

一日休沐歌

一日休沐無所為
槽頭馬鳴草滿墀
一日休沐無
所向森森潘陸隨
車障我名何幸入
通籍我胸何
苦抱岑寂君不見
甕城東出河橋濱
天街新雨道
少人右鄰季主左
白墮中有深巷無
囂塵巷深地
僻秋苔綠常時問
飲不問卜但聞剝
啄即同心何
況往來僮僕熟先
生倔強復迂徐先
生好客唯蔬
魚清時低賃伯通
廡殘年高枕瞿曇
書葉子同居
好心事精思妙語
摩金翅程君磨盾
亦竒才一揮

萬彙驅風埃人生友多不爲過牀前莫歎青瑣破
人生間少不須愁眼中西北有高樓高樓酒熱罍
中已五年落葉君須記高樓人冷日垂申十日一
別君休嗔諸君諸君慎相見長安容易改頭面隱
囊紗帽吾何戀不惜頻來布親串江南稻蟹饒西
風暫時擺脫嘲吳儂蒲帆數幅非難計且看芙蓉
映水紅

五月十一夜集西堂限韻

庭柯淨交枝落景罷炎蒸竭來延靜侶露頂如枯
僧微風播高談廣廈無飛蠅悠悠盛年歡默照歸

華燈

抱甕汲深井井深慄毛髮吁嗟寧爾爲將子結布
襪仲夏新麥登野飯趁涼滑惟應渾河听艤舟酌
江月

十年披素紈相顧半老醜忽忽風霾中冠蓋去八
九荷衣野無式羽扇不離手磨剗肘後章莫易杯
中酒

清塵隱高樹萬瓦光鱗鱗金吾勅雞犬疎鐘遞城
闌在昔鼓腹遊真意非等倫憐君納不借所愧皆
閑人

同羣富文藻風雅何翩翩新知竭要眇妙句必林
泉欲試成連音牀琴久無絃命兒讀豳風字字如
珠圓

送桐初

曼陀羅花開已謝鵲玉軒前無客來西望太行一
杯酒此身還不厭塵埃

古北口中秋

山蒼水白卧牛城三尺黃旗萬馬鳴半夜澶州看
秋月河山表裏更分明

涼夜不寐口占

沆瀣炎氛午夜平餘香猶炷一絲清風簷荔葉與
蕉葉時下空堂曳屐行

程霽堂至詩以慰之

客毛頰白盡相見惜庭柯弭佩三年改登階一揖
多微宵來鳥倦落日動烏叱暫止題襟淚江鄉近
若何

緩行淹水驛記別念山程雪片麻衣色風埃天馬
聲胸難消有故詩已到無情不娶非萊老全生苦
節貞

秋飲

驚飈翻白日塵影落簷際衆鳥何啁啾肅殺氣相
遞需生寡所歡妙理久沉沉滌慮期同懷觴政罷
苛細夕宇脫幘來澄光暎羣髻實成文字飲咀嚼
窮六藝往者永嘉輩放蕩不可詣潘石許投分末
路有垂涕遐哉粉飾心對值勉秋霽一勺波瀾生
深淺各厲揭躋聖寧讓先忘筌久難諦君看大小
雅伯仲本同系故人粲蕊芬房攏閔幽蕙聆情獲
欣解豁目絕雲翳今古去無終茲樂杳難繼譬如
食甘蟲聯蠕隱微蒂至味了不減糟軀任銷蛻微
涼斂膚澤枕具少清憇醉醒非酢酬滄浪待鼓柂

過陳次山寓居讀迦陵稿有感

連牆苔色絕飛埃手版閒拋破寂來坐有茗柯酬
夙好篋無楮葉罷新裁清華適俗能容嘯少壯評
交實愛才忝與周旋非一日銅官山冷桂枝開
短簷修榻對支頤今古論文更不疑此帙半從君
手錄爲郎猶及爾形衰草深白版鳴蛙處水長西
橋浴馬時風雅至今多絕響迦陵遺調使人悲

圓廬

小擬穹廬迥絕鄰白駒閒送陸行人清埃不遠艤
舟便塞草江花總一春

策形偃蓋一弓寬
樞戶清寥位置安
消得鳳城多少雪
貉裘氈被向來寒

田梅岑自南城來却贈

醉吟俱不輟
世許作狂猜
肩鋪行方並
春城飲却回
易眠氈屋煖
相待草橋開
花事耽餘子
同時尚有梅
隱者皆株列
長安咲捉衿
枯匏容一扣
掌劍有微音
居隔連街樹
清如冠雪岑
頻傷飛動意
爭免鬢毛侵

題杜亮生釣竿吟

杜生囊中釣竿吟
清泠激耳非凡音
眾舉罩仰世相向
五十未改滄浪心
孤生之竹獨絲繭
披裘澤畔空渙忍
六鰲連擲大何求
尺半鯉魚牛足趺
構巢兩架西枝曲
縞衣憶傍蘆中宿
照面澄江深不深
年年雪滿枯槎腹
枯槎不爛天東注
豈有桃花無覓處
臨風三嗅鮑魚羹
爲君擊碎珊瑚樹

十八夜對月與子猷作

古瓦修柯蔭舍南
參差城郭迥淒含
自窺塵面幾經缺
閒握顛毛相向談
清漏稀聞如辟地
深杯一照即澄潭
眼花竟欲窮霄上
避弋啣蘆影二三

題次山小軒和姜萬青韻

打頭伸欠爾何堪矮屋長眠擬劍南頻憶書堆當
料理泥塗十日謝朝驂

提沽責約有王褒

謂植夫

鄰堵相瞻雞共號能俟秋吟

通蟋蟀眼前脫略逐時豪

我結精廬一鉢圓春陰三里接飛綿長安來往無
他適異日風流絕可憐

車似雞栖屋似車胡琴撞碎興何如君家陽羨猶
堪說紫楝花開石首初

和程令彰十八夜飲南樓

客心搖落傍孤筇步屨隨時向酒家寒靚朔天高
絕雨秋闌燕市急催花離鄉渾識飄零雁在世宜
看早晚鴉能置歲華杯勺裏一帆終古浩無涯
十八城東破月輪淨街清影杖邊身風搖亭幔無
三里路隔棋盤又一旬紉袴實能呵醉尉鶻冠終
是聚浮塵爲君古淡非今日泥飲醇醪味得真

聞雁

羣飛日日謝江湖過眼風花迹也無十萬樓臺三
市靜月明端坐兩狂夫

送亮生南還即和留別詩兼寄些山先生

風廊微照兩啣杯能待城闈簇騎回婪尾易消爲
別酒隔年不卸有函梅園搖素奈辭春艷柁挾清
江下泐洄山步若邀斑杖健北湖長望惜莓苔

些山有詩謝夢奉和二首時亮生已南旋

述夢龍城雪予慚尚有心書來期不見形在覺何
深薦甲敷春老疑蕉數葉吟俗情占反復草閣倘
重尋

首夏江流穩吳帆望不孤歸翻先客夢杖只倩孫
扶隱几餘清晝乘車合異塗遽然如可待還寫掃

花圖

予留別有願爲筇竹杖之句此山集
青蓮句有閒爲仙人掃落花故及之

四月望夜得遲字

孰爲耽幽暇齋東退直遲清宵愁伏枕鞶帶強題
詩夏木承初影岑樓納一規乾坤方北戶端照莫
移時

呼盧歌

白日無根月有窟奕世身名悲汨沒健聞時輩逐
時歡輟食臨風罷嗟咄邸南游客羣翱翔傾囊一
擲觀堵牆袒呼不辨王與李施緋拖綠鬚眉張塵
埃萋葦矜能事實過屠門圖快意家無擔石握拳
來十年富貴磨竒氣程不識郭細侯禿纓蒯劍徒

悠悠谷量牛馬豈能計蓬蘽英雄多白頭

飲溲酒

眷言酌昆友陶然知水竒麩蘽豈一端醇耐毋乃
茲沉湎滑稽內適俗恒澆漓今夕數帆健滿引誰
當之寒泉伏百里憶出孤竹時俯飲自厥古哺啜
庸非師名理迥未辨衆醒醉豈宜所以寄末世嗑
嗑尤恐遲永夜舒清光椽桷浮涼吹一隅啓微咏
萬古安遐思良久冀有得澹焉空素磁渴羌咲能
解冥漠心能知東鄰擊肥牛詰旦來勿辭咄哉口
腹累寧被鴟夸嗤

仲夏吳雪蓬自土木歸見枉有作

避炎思出塞望遠久徘徊禿筆垂囊見顛毛戴雪
來交憐牆宇舊吟比遂聲哀清夜無遺感風堂颯
沓開

月涼茗飲歌

廣庭摩腹風脩脩缺月半挂濕柳條小童支鐺煮
宿雨耳畔彷彿鳴江湖地偏澤滷恒忍渴鹿車間
挽滿井遙寒泉行地寡風味乳花紅釀愁相澆日
前飛鞚致春薜郎官例賜隨蟬貂天人之糧不多
得梧勺未可驅塵囂銀餅緘貯出素手靴紋感皴

涵清嬌我行擬作梁肉砭名嫌紗帽非高超為憐
好友餽唐貢一升滿淪憐中宵又聞養疴忌內汗
瘦腋寧讓盧仝驕茗柯有理慎莫憚解事徒獻陽
穀椒

送程正路之黃陂丞兼懷赤方先生

平生獨竒尚紳笏一時情羨爾濯髯處窅然江水
清先賢妙為政游藝幸無名

二程夫子
生尉舍中

舒卷青雲內

非同骯髒行

畫家遵北苑墨法秘南唐二者能兼得茅齋竟夕
香嗜交尤念舊汲引愧為郎舉轡黃州近全身問

楚狂

併菊

併菊饒天意含芳入仲冬南窗欣有托東里漫為
容枯槁非時賞蕭疎與客供樊籬方集霰高枕悟
黃農

插併菊夜供有感

肺熱中宵甚書堂細雨孤雁鴻深杳杳草木感區
區顧影分叢咲移根賤色殊盧奴勤采掇風候斷
懸壺

咏後陶香爐

垂老餘閒拂拭中寒灰活火十年功色難初擬侔
蒸栗丹在何期學煉銅鼓鑄舊型終不改薰當小
炷與誰同內焚香
曰薰當可憐羔袖龍鍾後家世風稜畫省
東

咏桐君木枕

曲木如肱便可眠全身清戒白雲前何甘糟粕羣
容與自近淳龐益醒然富貴兩端詳夢久乾坤一
息弱絲牽枯心更際無名欲應有微言問杜鵑

咏次山藏劍

琉璃匣內泊無形屈蠖龍身自杳冥徒手力前餘

骯髒明眸相顧益娉婷一揮舉世頭俱白留待吾
徒鬢尚青瀕洞風塵少年事好將寶氣護文星

咏上若澄泥硯

耕有平田釣有陂爲陶年月幾何時前人泥土珠
璣貴中古文章草木爲自試墨華藏小閣休呼綠
鐵惑諸兒尋常柿葉題情處又有蟲吟出廢基

冲谷四兄寄詩索擁臂圖並嘉予學天竺
書

再報東臯一尺書哦詩松下晚涼如長城近日無
堅壘末路相看有敝廬甚願加餐燕玉暖少憂問

病梵天虛鬢絲禪榻論情性遶匣蟲魚已廢除
無遮願力合人天淨饌頻張侍講筵大部僧陀徒
譯字終年郎署反安禪空華想落滄江上故紙塵
勞繡佛前能事松枝許相易蕭齋揮灑舊爐煙

月夜書懷

今夜月光厚草堂殊未吟初疑近邊雪相顧滿華
簪一雁離羣早三年觸痛深荆花吹片片咫尺故

園心

連雨團圓節

京師以中秋
夜爲團圓節

虧盈此際看層霄無點翳
破鏡喜平安暖憶姜肱被羞彈卜式冠牆東讀書

地修葺莫彫殘

小軒闢除已移居其中有懷子猷

舊營茅棟憶江臯几席虛明似小舫白堊常年無
改作清宵一侶足遊遨塵沙實積菴摩內兒豎全
矜畫墁勞稍待月寒垂北戶地爐煨酒快乘尻
苦憐幽境閉門成一日常窗倍眼明臘雪竟宜添
薄竹藜牀猶是面寒城鹿皮淨結雙趺穩煙宇閒
飛數翼輕頻念江鄉點梅萼思君脫帽趨逢迎

西堂飲歸

城闌月寒暮煙重廣衢淨掃無飛鞚吾生緩步信

可歸近市何暇誇羣從一升已盡絮帽熱數語不
出衡門送輕風吹鴉滿樹頭石渠丈八今含凍久
聞西田新秫美釀成別調如秋水與子薄收計十
斛糟丘一築無堅壘泥塗未足憂輕屣

南軒種竹

西堂南闢市爲鄰擬種檀欒障午塵論尺勝求寒
水玉攜錢常避早朝人

古寺涼風挽鹿車貴唯買竹賤稱書遄歸不用憂
長夏手檢閒枝挂葛裾

儘有青光護藥闌却因石磴想風湍水文簾外立

晴晝嫋嫋亭亭三十竿

棟亭詩鈔目錄

卷二

射堂晨霽

四月八日

漁村

在婁門
右側

移竹東軒和高竹窗學士來韻

十三夜南樓看月

十四夜東署看月與葉桐初梅梅谷同用才

字

十五夜射堂看月寄子猷二弟

尤悔菴太史招飲揖青亭即席和韻

東署飲竹下喜上若自維揚來

泛舟虎丘觀獲得菊字

月夜舟泊惠山過秦園

石湖泛舟

積雪

虎丘雪霽追和芷園看菊韻寄松齋大兄筠

石二弟

韓慕廬學士見貽盆梅置軒中偶成

植夫下第見枉西軒兼懷次山

清明日雪蓬自白門來分得仙字

北院鶴

聞芷園種柳

用少陵春日江村
五首韻寫寄子猷

菜花歌

雨阻不得入城和梅岑

鄭谷口將歸索贈

胡靜夫先歸白門即席同用依字

十六夜登虎丘作

題堂前竹

夜泛湖至董氏園登閣和子猷韻

聞蛙

菊露和酒

和芷園消夏十首

磁枕

曝書

竹簟

葵扇

盆荷

蕉窗

茗椀

冰盤

碧筒

滌硯

過葉星期二棄草堂留飲即和見贈原韻

西園種柳述感

後陶留飲香河書屋

粵中丞送孔雀感其遠懷留止官舍作詩寄

之

集余園看梅同人限字賦詩追憶昔遊有感

而作

葺治亭後竹徑和牧仲中丞韻

祀竈後作

由普德至天界寺入蒼翠菴看梅曾為鄭谷
口別業漫題二首

二十八日偕朴仙看梅清涼山同賦長句

雪霽夢遊漁村和桐初留別詩並寄懷慕廬
學士

送孫伯琴之揚州

贈程吉士

和靜夫謝送惠山酒

題棟亭夜話圖

甲戌仲夏二十二日有吳門之役午憩句容
驛院夢為投瓊之戲予素不解此醒與客
論其禎祥真不異夢中說夢也又記歐公
札闥洪庥語幾于脫頤因題數語命客書
于壁以為他日來往笑柄

惠山題壁

松茨四兄遠過西池用少陵可惜歡娛地都
非少壯時十字為韻感今悲昔成詩十首

銅鼓歌

春寒偶題

棟亭詩鈔卷二

千山曹寅子清謨

射堂晨霽

四月八日

久雨逢晨霽寒衙及午蒸獨來堪脫帽四月不飛
蠅烏米離鄉飯青山苦行僧天池與林屋祇用一
枝藤

漁村

在婁門
右側

麥熟午風輕輕舟信水行野農時一餉漁父久相
迎舊藥安泉氣清眠樂鳥聲悠然無可屬此日眼
俱明

近郭村皆好漁村水護門征徭間架少風俗筍梁
存草木深相引衣裳野莫論頻來何所事濯足卧
雲根

失意滄江舊收綸東更東扁舟對茅宇落日度河
風放鴨村村女承蜩樹樹童無人更相信此地兩
三翁

移竹東軒和高竹窗學士來韻

稚子龍鍾當戶多北堂曾種向南坡魚竿都任兒
騎馬子種竹南軒有十年相顧剩魚竿之句鵲玉還矜客琢珂子有亭名鵲玉以二亭半有老槐也
十八年餐朔雪三千餘里隔江波移來檻外深相

似早有清風拂綺羅

此君十六未云多旋馬廳前旋築坡光藉綠沉先
擗管徑滋碧滑少鳴珂身無鳳德難諧俗日對雲
心與逝波尤怪南鄰閒酒伴滿量烏榼覆紅羅

十三夜南樓看月

水鄉月色真娟妙獨夜東吳靜賞偏澹處祇容山
濯魄秋來方信客登天北人謂蘇州為天堂一聲清笛如尋伴
七里遊人未滿船直北再瞻兵氣勁龍沙早雪是

今年時大軍北征

十四夜東署看月與葉桐初梅梅谷同用

十才字

高樓玩月獨徘徊東署荒涼今夜來修飾似曾須
斧鑿清真誰謂出塵埃桂枝竹葉連秋草山影河
光半酒杯自信端憂無暇日綠苔堪惜謝家才

十五夜射堂看月寄子猷二弟

西署徵歌東署聞南樓送酒北堂醺人間清夜無
拘束千古歡場孰冠羣八月鄉關多過雁中年心
事祇看雲侍香班散聯吟去疎柳長牕坐卯君

尤悔菴太史招飲揖青亭即席和韻

蘇家巷口揖青亭間日重登山更青籬落不妨騎

馬客郎官原近老人星三秋鶴實身前樹

亭側有大棟合抱

二寸魚吹水上萍却笑南園成獨醉

是日諸君皆不飲

滄浪

咫尺喚難醒

東署飲竹下喜上若自維揚來

故人連袂至秋竹氣蕭森芒屨天如約匏尊世不
尋長閒一日雨過去十年心放浪東軒內庸誰寄
酒箴

時尚饒名理吾人醉入微清談原不飽白日豈徒
歸竹葉杯無底桃花水忽飛風流兼二阮秋被滿
書帷

泛舟虎丘觀獲得菊字

佳晨得羣遊即事異
輶軸坐持一杯酒
移賞竟雲木茲丘不厭登
城郭已迴矚清歡
寄人表今日寡絲竹秋旻易
靉靄賓主共沾漉
回舟看稻穗歲事喜初熟
登登塲杵鳴靄靄茅簷簇
還剥長蕩菱思把故園菊

月夜舟泊惠山過秦園

直爲梁谿一繫船
夜山風露共蒼然
行來鐘歇空園裏坐覺茶
甘秋樹邊池影低
枝多宿鳥月明此處却聞
泉畦丁欵客渾常事應怪
深宵數笠圓

石湖泛舟

八月秋山畫不成
萬松梢上夕光清
獨來捲幔無人見
雲在澄潭着底行

船裏看山拂衆情
看山兼愛石湖名
無端野鳥渾相識
客飲一杯啼一聲

是日水鳥鳴不已以此催盃

積雪

積雪光連曉
疎窗映處明
夢闌紛纈眼
風起不聞聲
舊宇迎曦早
餘寒閏歲成
星星撲殘火
虛白浩吾生

虎丘雪霽追和芷園看菊韻寄松齋大兄

筠石二弟

鬢絲寒颺五湖風殘雪山山浪打空今日酒醒橋

萬里春帆不趁馬頭東

是日騎馬
至臯橋

城角飛鴉無定時東園蕭瑟九花遲紅姑子爛三

塘晚那及吾家麂目籬

黷黷微霄玉塔光僧廬稠疊臘梅香一年說餅鄉

愁劇釀點吳茶似酒黃

畫圖可耐客思家羔袖凭欄望已賒歸去東軒好

筠竹夜窗深玩海紅花

韓慕廬學士見貽盆梅置軒中偶成

遠煩健步移春至恰被春寒勒未開瑾戶又經三
日雪昞花先長一盆苔氣條鬱鬱將驚蟄拊萼重
重漸抹腮最忌隔年澆臘酒市橋方法總凡材

植夫下第見枉西軒兼懷次山

官舍漁村似王郎單舸來江湖行尚早歌泣世何
哀書籍春庭閣梅花高院開眼中人老少離合憶

陳雷

清明日雪蓬自白門來分得仙字

吳筠相問訊時節各淒然雨色南園柳鄉情白下
船倦遊寒食後邀客午廳前同舍清無比蹉跎類

學仙

北院鶴

四鶴不同致，翛然神迥超。迭鳴如在野，羣謫未歸
霄。深恨羽毛貴，誰加園囿遙。幾時移密竹，休沐靜
相招。

聞芷園種柳

用少陵春日江村
五首韻寫寄子猷

遙聞行藥處，冉冉柳枝深。碧色時開眼，年華自賞
心。鳴禽音易革，永日向重尋。天外春帆客，飄搖感
至今。

易植吾鄉柳，叢生孰計年。移來遵僻路，常是伴寒

泉。小院清陰合，長渠細溜穿。知君有幽意，處處寫

江天。

惜樹齋前樹，疎花綴小紅。獨遮西下日，不礙北來
風。食益瓜蔬飯，行嗟襪纈翁。千條兼萬縷，長短故
園中。

故園何所有，白石與蒼苔。寂寞終無用，婆娑豈不
材。柔絲青可把，愁絮撥難開。惆悵橫戈地，秋風拂
馬來。

射圃空心柳，他鄉也自生。風蟬紛去住，朝菌等枯
榮。已得長眠嬾，還成暢舞名。蒼茫疑萬里，只此共

離情

菜花歌

吳中菜花天下無
平時照耀黃金鋪
朝陽夕陽幾百里
惟剩白水連青蕪
四月吳中春事足
四郊花氣穿城瀆
平分千巷畫船閒
農家兒女無拘束
農家兒女飯出遊
踏歌不出畦兩頭
頭蠶繅絲二麥穗
油菜結子柔桑抽
勸農使者停征稅
廳前畫諾花前醉
水曹散吏舊期門
也騎細馬傍山村
君不見他鄉井逕
無尋處春風遠拓
黃花戍含哺鼓腹
只吳儂菜花中朝
菜花暮

雨阻不得入城和梅岑

霉雨疎還密
霉天暗復明
書帷蚊蚋大
官閣莓苔生
競渡傷吳俗
沿城滯越兵
期君舟楫外
阜蓋豈難擎

鄭谷口將歸索贈

素箏濁酒舊相於
少日論文尚嘒嚅
執戟起家同避世
荷鋤歸隱即真儒
官蛙激耳胸鳴好
古篆連牆屋漏俱
獨趁吳波清駛去
臨行聊爲捋髯鬚

胡靜夫先歸白門即席同用依字

十竹秋來好連宵
咏式微獨攜詩卷
去不食鱸魚

歸棟葉夢難數柴門靜可依吳船快于馬遲我坐
漁磯

十六夜登虎丘作

虎丘深夜上寒月似晴花出定無僧看同遊有客
誇閣門彈指見石片席茵斜路熟來如夢輕舟信
是家
樹杪浮鴛瓦罌罍望處明葳蕤寒不鎖鈴鐸夜微
鳴人散星千點天高雁一聲吳煙正暝顥絕頂可
同行

題堂前竹

野竹垂梢暗一庭經年坐對迥忘形誰勤插棘防
高榦近喜穿泥發小丁地缺秋窮宜長王天寒日
暮自娉婷有時騎馬街南去遙看牆陰接尾青
此地還爲幾姓留懸知種竹不須求箇中吟嘯亦
難事眼外陰晴皆好秋將築小谿通鶴步豈勞殘
臘祝狸頭晚風灑灑長簷下九月瀟湘可卧遊

夜泛湖至董氏園登閣和子猷韻

路憶探梅處沙頭略約平秋林亂榛莽遊騎暗怦
營往事水螢散隔谿風鐸鳴羣山好相見來日敞
雲楹

黯黯梅花夢蒼蒼桂樹林不成招隱賦終負歲寒
心澤國鴻來晚天涯夜共深浮生尚何冀此際更
須斟

聞蛙

新竹搖夕涼蕭蕭四簷井寓目意已愜傾耳物難
靜所嗟草木蕃沐此風露永昆蟲各任時日月不
停景南園舊經行陂塘盛藻荇長竿投黽媒隨手
墮笕簞貪殘實口累塞淵忌心秉誰能犯虎乙終
是挈魚丙一鳴胸已竭合羣氣方騁我官同蠹氏
清夜聽閒冷忽憶寒蟬號西風發深警

菊露和酒

甘菊黃白花嚼之駐玉顏方書雖足徵服食媿嶼
蠻重鉛以為郭鼎器通玄關蒸茈得物理采掇良
非艱日出筐筥香夕火聞潺湲泊然結為露側注
歸彎環久飲目絕翳腦滿髮不斑將遺山澤臞鑿
坏同石頑還念高陽舊苦辣摧肺肝攪和久有法
解熱需清寒連瓶傾一杯新意衆已歡固緘比大
藥執守命小鬟何辭倒渴烏用是光盤餐逍遙北
樓上壓飯當陽山

和芷園消夏十首

磁枕

小睡長天勝靜持東齋清秘枕中菴嫩涼一息應
誰較除是遽然自得知

曝書

十五年間萬卷藏中年方覺曝書忙遙憐揮汗續
繙處時有微風送古香

竹簟

七尺莢笙帖腹便消除一日夜涼前故鄉此物非
殊貴不設紗幬恣意眠

葵扇

東帶那容不受塵放衙天許作閒身老槐門巷風
猶昔來捉蒲葵得幾人

盆荷

西窗荷葉大如盤煙雨尋常作畫看三十六陂身
已到不勝清冷欲歸難

蕉窗

昔年築室類吳舫曾有微言托綠蕉聞道春帆同
一色可能拄笏坐終朝

春帆芷園齋名

茗椀

卯君茶癖與吾同對客長愁放椀空近日衙齋須

藥裹一杯清澹只寬中

冰盤

絺窗木榻靜無蠅
內窖常支過午冰
回憶吳中應一笑
紅鹽不下減風稜

碧筒

白玉蓮花手作杯
掬香一石玉山頽
平生狂飲無拘泥
解折荷涼第幾回

滌硯

宿墨能除硯始靈
多生于此獨忘形
何由一致中泠水
鸚鵡長教潑眼青

過葉星期二棄草堂留飲即和見贈原韻
石橋乘興去山遠跨塘秋二棄君何取孤蹤我自
浮不同吳市隱初罷杞人憂曲徑深延佇芙蓉面
面留

野亭清可畫多竹少芭蕉石穩行穿澗椽稀坐見
霄遙呼如荅嘯雄辯久騰驍九月胥江潤輕舸逆
晚飈

高士今誰在深杯問素心魚天舒細靄雁陣播寒
音弔屈難重賦遊梁只一琴
時坐有鄭賈生相思無遠近來
往即山林

西園種柳述感

在昔傷心樹重來年少人寒廳誰秣馬古井自生
塵商略童時樂微茫客歲春艱難曾足問先後一
沾巾

再命承恩重趨庭訓敢忘把書堪過日學射自為
郎手植今生柳烏啼半夜霜江城正搖落風雪兩
三行

後陶留飲香河書屋

老厭燕南閱歲華昇州客舍酒重賒無多柳葉連
橋暗漸減冰嘶落照斜舊事隔城愁上馬

燕邸留飲
多為門禁

不成醉
散去新年賀節獨君家不辭半醉籠鞭去待看北
山桃杏花

粵中丞送孔雀感其遠懷留止官舍作詩
寄之

曾聞粵客珊瑚價初識交州孔翠奇絕嶠籠閑能
致遠遐方珍貢自乘時荒衙闔戶蓬為珥瑣印餘
糧鶴獨支何事投棲來萬里故人情好未相宜
中庭矩步意難安牆角梳毛雨漸乾不用襦袂誇
組繡還因羅網念鷓鸞眯盲空謝西施贈點染徒
煩荔子丹他日翮全應放去郁伊絳彩戲林端

集余園看梅同人限字賦詩追憶昔遊有感而作

詰曲春城似水村暫遊風日倍清溫誰家芳草多
延坐一半名園悞叩門丘壑重重翻畫稿梅花故
故點山尊頻年漫信能分別耐可巡簷細討論
鄧尉西谿不可名清涼幾樹獨關情鳩車竹馬曾
經處鮐背龐眉識此生終古朝花愁暮落早春閑
雨暢新晴杯闌即賞江光妙表裏澄鮮徹眼明
灑掃風堦望欲迷十春重坐此枝西雲山不改詩
常在草木同歸物未齊

昔年曾與此山初明遊清涼看此花

寺憶聽經張

淨饌人疑發甕檢前題午天一夢空花碎處處飛
鴻印爪泥

重攄舊緒感新悰祇合澆春罄百鍾杖履縱橫開
小徑崖阿升降撫層松迥非金粉當年氣各保冰
霜異日容末坐一編應記取梅花分社半山農

分社

葺治亭後竹徑和牧仲中丞韻

我本荷鋤人何妨負鋤與跬步春園空蒼然隔林
語
關草古徑出汲水冰池開此君煩灑掃不厭數能

來
老竹折不回迸根滿左右瓦礫亦何常夕陽空負
手

虛亭尚無名餘霽陰交加箇中雖見小坐看四時
花

水竹賞無時疎籬防一匝朝驅白項鴉夕柵綠頭
鴨

官閑一事幽竟日可淹留幸不求吾是棲棲元道
州

祀竈後作

除騷餘閒夜粥遲棟亭兀坐自吟詩生平暴殄書
堆裏已斷庚申那得知

割羊剥棗竟無文祈福何勞祝少君所願高堂頻
健飯燈前兒女拜成羣

楮火連街映遠天歲行風景倍凄然江城爆竹聲
何據一片錫香三十年

由普德至天界寺入蒼翠菴看梅曾為鄭

谷口別業漫題二首

出寺復入寺一年閑馬蹄谿山遊不遠井徑路多
迷浩劫前王造微名過客題循廊還幾許幽處凍

儂棲

小院通山翠，輕紅兩樹花。禪枝無夢想。

俗以冬樹為夢樹善

果歷塵沙

梅側有枇杷樹近百年已抱子矣

覲面堪危坐，臨風但啜茶。

子真遺墨在，起歎日將斜。

二十八日偕朴仙看梅，清涼山同賦長句。

一冬無雪雨亦好，連晨江霧梅開早。水曹寒官封

印來，避債何嫌拉。詩老空山楚楚花，寂寞園丁得

意先除掃。似與繁英送小年，轉憐炙背當晴昊。陽

和爾我同閒適，春色人情破。懊惱休辭洗盞勸，紅

香苦笑塵顏加粉澡。漫漫桃李東風事，孟婆合阜

誰能保飛來翠羽，正啁啾冉冉斜陽坐。衰草

雪霽夢遊漁村和桐初留別詩並寄懷慕

廬學士

爐煙繚碧窗，凝白起戀黃。綢煖睡餘凍，鵲一聲如

裂帛。殘英幾點亂霑書，剎那春夢身先覺。咫尺漁

村徑早除為問，比來何事健客來。還解佩邊魚

人日棟亭人卧雪，二年燈火樂三餘。不愁食指無

晨爨，常媿寒家有賜書。貧士孤雲元合調，初寒厄

閨費乘除碧澄坊。裏如相待布穀聲中看網魚。

送孫伯琴之揚州

個儻風流妙說詩孫郎簡嘿亦吾師枯棋濁酒無
多日彈指粘燈放鵝時

春山兩岸碧連蜷自在江流雪後天好去攬身圖
畫裏不妨擁鼻米船邊

贈程吉士

鬚如蝟磔口經義放膽能論天下事足不窺園又
十年後生可畏真難器梨譌伐臙鶡冠子腹筍一
啓如流水送子春江路正泥雪晴小住爲佳耳

和靜夫謝送惠山酒

折券難憑守口瓶醇醲何幸托蘭馨從來第二斯

無憾宜補茶顛陸羽經

神瀆惟甘秋露辛內家法釀只愁醇滑嵇腹大原
無論畫榼仍留待晚春

題棟亭夜話圖

紫雪冥濛棟花老蛙鳴廳事多青草廬江太守訪
故人建康並駕能傾倒兩家門第皆列戟中年領
郡稍遲早文采風流政有餘相逢甚欲抒懷抱于
時亦有不速客合坐清嚴鬪炎熇豈無炙鯉與寒
鷄不乏蒸梨兼滷棗二簋用享古則然賓酬主醉
今誠少憶昔宿衛明光宮僇伽山人貌姣好馬曹

狗監共嘲難而今觸痛傷枯槁交情獨剩張公子
晚識施君通紵縞多聞直諒復奚疑此樂不殊魚
在藻始覺詩書是坦途未妨車轂當行潦家家爭
唱飲水詞那蘭小字幾曾知斑絲廓落誰同在岑
寂名場爾許時

甲戌仲夏二十二日有吳門之役午憩句
容驛院夢爲投瓊之戲予素不解此醒
與客論其禎祥真不異夢中說夢也又
記歐公札闢洪庥語幾于脫頤因題數
語命客書于壁以爲他日來往笑柄

行役有餘暇驛亭無俗聲遠攜柎榴枕午睡華陽
城清風惠然至遽遽因之生意于將化胥反爲蟻
鬪爭憑陵叫袒跣未讀五木經茲夢亦云怪菜祭
非人情卜言勝者吉予寤氣已平請客勿獻疑理
絕智不明平居澹志慮懷抱鮮經營造物適爲戲
得喪安足驚微涼順夕月束帶仍遐征

惠山題壁

積書巖下小池通确犖行穿複壁中忽闢空堂感

新咏鄰家慘澹杏花紅

顧梁汾小園中新咏
堂乃故友成容若書

合抱楓香老桂枝卧雲堂上舊題詩茲身久分無

丘壑可羨秦家濯足池

主人暑月邀濯足澗中

松茨四兄遠過西池用少陵可惜歡娛地

都非少壯時十字爲韻感今悲昔成詩

十首

西池歷二紀仍爇短檠火簿書與家累相對無一
可連枝成漂萍叢篠冒高筇歸與空浩然南轅計
誠左

今夕良讌會今夕深可惜况從卅角遊弄茲蓮葉
碧風堂說舊詩列客展前席大樂不再來爲君舉
一石

閑居咏停雲遽若戀微官行葦幸勿踐稅駕良匪
難寸田日夜耕狂瀾無時安恭承骨肉惠永奉筆
墨歡

竒雅慕古人其次思與俱猗何謝太傅陶寫托笙
竿榮名罰恒憂服食不須臾瞑眩冀有瘳聲伎安
能娛

勾陳逼招搖幽天風夜至單于六羸走羽林呼動
地三驅度瀚海持冰裹糗糒念我同胞生旃裘擁
戈寐

吾宗詩淵源大率歸清腴叔氏振頽風句不修廉

隅選友得關中沈雄避時趨會應策驥裏歷塊過
名都

黃鐘散爲徵太音聲久希前賢橫專據各得具體
微盲瞽不安命小儒多腹非有斐貴切磋且願誦
緇衣

曩年拓強弓齒牙一何少腸肥腦復滿猛敢過鷹
鷄軒起觸四隅周肱不可趨茫茫紅塵中末路炳
龜焦

伯氏值數竒形骸恒放蕩仲氏獨賢勞萬事每用
壯平生盛涕淚蒿里幾悽愴勗哉加餐飯門戶慎

屏障

酒黨日以散婚宦方乘時交遊山水間町疇羅松
茨貨殖非所好欵段無不之汙汙大江流煙霞相
與期

銅鼓歌

雅州銅鼓烏羽青四蟾蜍紐鏤虺形豈堪懸注肆
考擊或疑烹飪充蠻廷又云丞相渡瀘時鑄以張
軍留模型前賢遺迹不可測語患怪誕多離經物
非適用貴取意居常磨洗來寒廳納水三斛副是
腹爬梳膩垢光而熒毫芒差若列支紀園轉直可

窺盤星刑天獨舞猛志在一于腐朽求精靈豪華
徒誇子父鼎賞鑒何重哥窑餅堦除蔓菁吐紫雪

吾方灌溉開墮町

鼓面若儀器四紐峙立疑
可測驗水土以待知者

春寒偶題

一月春寒春漸忙連晨集霰雨浪浪侍兒旋撥薰
籠火從騎新油貯酒囊梅比隔年添料峭燕來新
社轉淒涼無邊勃鬱東風意遽許青紅眩太陽

棟亭詩鈔目錄

卷三

朱園看梅憶子猷次同人韻

三月六日登鼓樓看花

後陶索酒看城西花戲東

雨中牡丹

送亮生遊閩

題雲辨上人小冊

孔雀

題馬竹溪藏八大山人畫鹿

宋牧仲中丞見招深靜軒軒舊爲官廚中丞
新闢以款客奉和二韻

閩門開帆口號

歸舟口號和宋中丞後園六絕句

題明妃圖

射堂柳已成行命兒輩習射作三捷句寄子

猷

赴淮舟行雜詩十二首

廊前玉蘭

雨中飲餞醉甚卧輿中行三十里始醒戲題

一首

雨霽望龍潭諸山

玉山僧院牡丹

發橫林未到錫山六十里示同舍

雨霽過滄浪亭遲悔菴先生不至和壁間漫

堂中丞韻

三月九日田梅岑攜二家詩見訪集後陶寓

齋梅岑有作和之兼傷雪帆

高鶴修琴友索贈時寓僧樓即事戲之

題廊前玉蘭二斷句

西堂新種牡丹雨夜置酒限沉香亭三字
三月二十六日登舟值雨漫題
過燕子磯

夜雨宿玉山寺

和靜拙翁圍爐原韻

送陳吉士

西池集飲喜晤陳心簡侍衛

雨中和漁村韻

魚廠漫題贈朱遵雲

題周雪客廬山托鉢圖

晚晴述事有懷芷園

雨夕送令彰還廣陵

戲送錢穆孫

諸敏菴彈平調琵琶手法特妙無和之者感

賦長句

題畫有感

贈武元樸

觀奕口占和漁村

看西廊秋葉

戲題李萊嵩使君新舫

經郟城從行摘柿偶述

過沂水有懷芷園弟

九月七日蒙陰曉發

過溪

聞杜漁村述方逸巢近况即和膝齋詩奉東
逸巢讀是痛非真臂句作詩見荅復和一首
廳前紅梅初開折一枝寄子猷索詩

耦長索題行卷

西軒

支俸金鑄酒鎗一枚寄二弟生辰

引鏡謝客

聞靜夫傷臂口占二詩慰之

送朱林修北試

棟亭詩鈔卷三

朱園看梅憶子猷次同人韻

千山曹寅子清謨

中春陟梅園出谷復入谷芳條不可折秀色奪人
目高風散餘靄夕景斂山綠啓塗更休駕從騎莫
紛逐當門誇窈窕潔若理膏沐餐勝洵此遊竟日
少重複寧辭白雪唱聊借朱絃肅主人具茗飲野
客坐高麓清琴鳴花巔微韻入茅屋狡紅愁退色
縞素盡歸朴乃知清冷聲真賞在草木我行石城
東每擬寫橫幅遠慚北枝妙把筆手先縮何當絕

谿徑來往伴幽獨有情終未遂詎止戀三宿當
三月六日登鼓樓看花

東風澹蕩搖晴煙城西天桃紅欲然約略谿山十
餘里侵曉出門春可憐昔我髮未燥遊戲窮崖巔
生憎圉人控驕馬絕愛牧兒飄紙鳶爾來三十有
七載看花恍惚如遊仙三杯故事公讌酒半日送
客遊春鞭人生富貴聊復耳懷抱于今何有焉桃
花紛蒨粲鍾山遙拄連雲陰遞變幻麗景爭淒妍
蔓草零露不足慨怪爾青紅間色相連蜷譬以張
錦俗莫譽將貽績繪神難全鳳凰一去李白死大

塊煥逞雲霞篇屋角鳴鳩催急賞街頭士女羣喧
闐枯荷包鮓絲絡榼薺花壓鬢輿摩肩太平有象
此足樂冠蓋無事宜周旋煌煌麗譙藏 聖諭草
木暢茂當皇天憑高餐勝忘歸去後時追憶知何
年

後陶索酒看城西花戲柬

毘陵臘酒白如酥取助官廚不用沽桃李漫山人
坐卧一雙蠻榼罄來無

雨中牡丹

十日笙歌興劇闌殘枝仍耐雨中看香披翠幕醒

初解淚漬霞渦膩不乾
僉俗煎酥矜韻事北人用酥煎華
工留譜擬清湍文通漫歎風流盡
容易雕簷蠟炬寒

送亮生遊閩

橫絕文林世不知誰供五木解
朝時回頭破帽真

堪溺自向漳州喫荔枝嘗自負為袁彥道

天壤漁村名實同三年曾伴信天翁
釣竿此去如

相訊腸斷吳門春夢中漁村初意由浙入閩

夢遊震澤醒匡廬坡老當年語不虛
聞說扁舟重

料理幾多風景勝南徐又改道由江西南行

瑤琮白雨濺空堂三板江船穩勝牀
急去炎方寧有意摩娑老眼看扶桑

題雲辨上人小冊

自縛茗華掃落花碧雲時遣寸心遐
南桁不是無車馬老樹匡牀只戀家

孔雀

離鳥愛其尾弄影晴堦前風煙一照燭
毛羽何新鮮披揚拂綵縷錯落排金錢
勢如龍鬣張狀若車轂圓交鱗側修頸
進步聯高拳不鳴亦臑膊欲顧多蜿蜒
終同雞擇時實類馬惜韉有時妬紅紫
獨

立愁雲天緬彼東南飛安知西北偏充君堂下珍
聊吟池上篇懿哉蔭嘉樹舞鶴方翩翩

題馬竹溪藏八大山人畫鹿

豐草長林獨離羣四時風角祝朝昕何因不畫青
田鶴叱馭雙雙禮白雲

久識山中猿鳥性孤蹤不用狎林泉西風秃尾田
間道亦解掀脣鳴向天

宋牧仲中丞見招深淨軒軒舊為官廚中

丞新闢以款客奉和二韻

渤澥有時淺震澤何須深即除庖溜汙遐見滄浪

心三吳民壽康百吏秉規箴臺觀詎云侈絲竹非
荒淫中丞獨儒雅示撫無絃琴叨承郎舍舊許闕
文字林飯我商丘麥散步清池陰隨風振蘭藻不
覺畫戟森所以覆高葉野鳥懷其音

嗜好無等倫同此眼根淨圓荷與疎柳入望已清
勁端居用焦勞硯格久遠屏想當微雨際自扣玉
塵柄我行循東牆堅坐樹影正歸來覺愴恍浪楫
逐飛迸徒羨濠上樂未喻摩詰病夜涼草短札盥
手待新咏

閩門開帆口號

斟酌橋邊雨乍晴
闔閭城外片帆輕
梅花逐客春無主
誰信東風不世情

歸舟口號和宋中丞後園六絕句

歸懷稱好風舟楫自容
與早市酒花香梁谿共誰語

平川麥一翦百里帆全開
何如故鄉道沙燕掠塵來

船尾枕櫓眠春浪分左右
百閑看一忙高下柁師手

細雲不吐葉垂申風力加
郵亭十四五數到棟亭

花

日長眼易倦遠山青一匝
遮莫解吳醒京江綠頭

鴨

風帆亦復幽煙花不可留
長遊無一事三月下揚

州

題明妃圖

豐貂不煖女兒心琵琶自作
闕支語千年青塚黑河深
綠鬢文姬歸漢去君不見
輜輶萬兩嫁烏孫浴鐵千羣
迎主婦東風野草華山畿
鴛鴦雙宿韓馮樹

射堂柳已成行命兒輩習射作三捷句寄

子猷

前年風雪尚蓬頭幾日織條竟綠稠無限蜩蟬齊
沸了又攜兒輩踏晴秋

繩量馬道不欽斜雁字排栽築水沙世代暗傷弓
力弱交牀側坐捻翎花

畫鼓鼙鼙簇羽繁黃麈命舞亦軒軒金城涕淚他
年事特寫新詩寄芷園

赴淮舟行雜詩十二首

荒江乘遠眺餘靄薄西陵沙草微喧雁菰蘆暗構

燈民瘵謀野得生業媿漁能冉冉孤帆興滄浪去

未曾

離程半九十愁對隔江峰寒沙爭飛鳥晴沙隱卧
龍行歌惟牧豎荷簣有村農取次棲霞近丹楓暗
幾重

回帆重起碇月没青山頭旋旋鴉盤曙蒼蒼霧翳
洲浮光延蚤景穩卧起寒流借問蘆中客何如水
上鷗

鹽漱凌晨罷青簾上海霞殘山多磊砢柔櫓自嘔
呀承掬金焦小分風吳楚賒無人瞻使節野鷺起

蘆花

揚子橋邊路愁牽百丈長
逆流聲滴蕩寒月影清
揚炬火明津驛貂褕滿座牀
黔黎正艱食舉酌莫相忘

短日千帆急湖河簸浪高
綠煙飛蛺蝶金斗泛葡萄
荀失藪哀鴻叫搏空黃鵠勞
篷窗漫抒筆何處寫逋逃

憶昔長淮水乘流直上天
估船歌得寶魚市聚攤
錢近郭吟黃葉寒煙漫白田
西風三屈指無恙託殘編

雲帆初破浪畫檝更傳餐
鳧臠來方物車螯上食單
簿書慙素飽風水幸平安
欲上淮陰廟消搖凝睇寒

數拒羣公餞微吟許劍詩
枳香漂母廟霜涸露筋祠
遞馬連堤站枯魚絳樹枝
頗聞勤職貢文物勝前時

事異樵風便舟輕接浙來
浪文仍纈眼驥足不沾埃
但覺揚州近遙瞻江霧開
布帆須努力遲賞射堂梅

北固凍雲柯南徐寒浪多
江天餘澹沲日月易磷

磨一水週龍藏羣帆雜鳥囿誰期千載後遺恨暨
陽阿

危峰如卓繖百里望龍潭支水穿寒碧晴雲上蔚
藍客程過大雪家信只空函或問淮南事中泠水
一甌

廊前玉蘭

殘梅擁髻燕差池開到辛夷晝始遲淡日輕雲工
捉搦長風闌雨費支持連城不斬春無價隔歲先
胎玉少疵却傍青霄慚橐筆誰傾北斗浥瓊枝

雨中飲餞醉甚卧輿中行三十里始醒戲

題一首

卯醉曹騰墮玉鞭筍輿輕藉半程眠未妨花朵塞
帷笑應共春山絮帽偏耳雜林風時一醒腹搖鼻
息更頽然吳儂愛我知何語放浪江湖載酒船

雨霽望龍潭諸山

織影流雲接寶華江風攪翠靜紛拏一方雨脚藏
龍氣百軸晴眉展畫叉寒闕谿桃松欲倒戰餘石
壘鼓曾搗可憐金粉空塵土自信勞勞飯煮沙

玉山僧院牡丹

舊種知名貴重臺雜卉茵紫衣端向曉紺宇靜移

春江露扶頭重山杯洗足頻闍黎將此意歡喜供
天人

發橫林未到錫山六十里示同舍

冥鴻沙鳥極升沈畫舫青簾共盍簪鼓吹似誇行
部樂石尤偏解看山心洗塵雪乳論餅賤罽淖春
蕤沒脛深見約買田非臆說煙鬟來往識挈音

雨霽過滄浪亭遲悔菴先生不至和壁間

漫堂中丞韻

領略南禪茗一杯滄浪亭上步紆迴野雲閣雨都
乘趣亂石分畸自起堆士女閑拋寒食過郎官遊

及菜花開赤欄晚晚添春漲鼓角頻疑小隊來

三月九日田梅岑攜二家詩見訪集後陶

寓齋梅岑有作和之兼傷雪帆

酒面漚吹曉上塵雲霞勢合眼前人寒分白曉黃
昏雨老看吳頭楚尾春關塞招魂埋宿草江湖餘
潤泛枯蘋

雪帆歿傳君營其喪

揚州太守憐才舊生死論交

誼獨真

高鶴修琴友索贈時寓僧樓即事戲之

雅識吳音妙微風縹緲間客牀閒綠綺僧榻看銀
山龍樹身多幻鴛摩鬢早斑無由破岑寂邂逅一

開顏

題廊前玉蘭二斷句

剖玉吹蘭自脫胎
司春辛苦護花臺
毳苞滿地無風掃
時下西廳縛帚來

暖日蒸雲目欲眇
石闌隱几對雙思
此花嚴淨離文字
紫焰空題白傅詩

西堂新種牡丹雨夜置酒限沉香亭三字

幕歷分叢雨未深
小軒清醉漏沉沉
貴家風範真難近
一宴蘭膏直鈿金

梅子揚枝綠近牀
年年拚道趁春忙
馬蹄更漫嘲

寒劣湔洗門程百寶香

不廢風流是此亭
移花月令按圖經
太平翰墨多清暇
預劃烏絲製小屏

三月二十六日登舟值雨漫題

夏雲匝匝淹春雨
放溜怏吹送柁風
水草差差飛燕子
衾裯泠泠對鳧翁
燕居西塞漁簑外
眠食南宮墨瀋中
擾擾簿書無日了
枉拋淨綠戀殘紅

過燕子磯

夾岸蒲蘆鳥毳重
楚天煙浪劃江濃
巖花瑣碎常疑雪
野寺微茫漸覆松
剩有閑沙窺鷺格
欲因細

雨看魚喁峭帆的的空濛去極浦回聞十里鐘

夜雨宿玉山寺

檻外寒江百丈深一龕側塞雨泠泠道人自爇香
煙坐童子能通水觀心海若何求頻闕戶修羅此
際罷彈琴茫茫寄眼蟲天外已聽雲堂粥鼓音

和靜拙翁圍爐原韻

絕塞穹廬火山堂楮拙爐客年遊思苦江草坐來
蘇遠惠稱船賤分貽束帛煇烘春喙詩老熾位擁
梅姝眈熟丹培竈紅熒曙促烏嬾寧工自煨飲或
拉諸屠粟事間重疏芋香或莫呼不知增雪笑吟

得曲身無

送程吉士

十日九雪徑未開于思于思著屐來升堂撥我楮
拙火發端設難窮根芟自我離羣久廢學嬾從鉛
槧搜糟粕埋頭愧子真古人何物能移讀書樂我
今再拜復何辭慎莫羞為童子師過江驢券晴應
賤相待鮒魚大上時

西池集飲喜晤陳心簡

邊海極相思江關老賦詩非干投轄數所恨識君
遲石葉新妝女儂音白項兒由來紈袴輩不稱眼

中奇

一品尋棋格雙彈試越謳蠟香凝夾弄粉鏡挂岑
樓假託齊奴富乘除宋玉秋清池方數武來日更
陪遊

雨中和漁村韻

不掃春廳雪鳴騶罷往來嬾中人日過醉後粉梅
開飲隊妨伶妙狂歌倩楚才劇憐餘韻在寒雨滴
蒿萊

魚廠漫題贈朱遵雲

樹外南風至江邊新雨涼愁翻龜策傳嬾校蒺藜

方季主原非隱泉陽本不傷君看拍波燕來往鬪
身強

題周雪客廬山托鉢圖

我病恒在手君病常在足平生周公瑾誰輸五困
粟流光不羈馬即事入林鹿終期卧名山逍遙採
芝朮

晚晴述事有懷芷園

兀兀黃梅雨西風漸強晴困防推案睡閑習遶階
行節氣餘萱草庭柯憶馬纓左藏穿掖路微月夕
塵清

鷓首綿仍御龍舟麥宴寒轉輸通慶尚疏鑿下桑
乾子弟能筋力輿僿半綺紉鄉愁正荒遠星斗莫
闌干

雨夕送令彰還廣陵

陂蕩水連江泥塗聚石砭麥耜閒比屋鹽筴困封
樁老客魚千里家山鱗一雙何緣共貧病愁坐雨
瀧瀧

戲送錢穆孫

耀君嗑嗑可一石穆君一石興有餘寒曹未怕傾
家釀已辦萍螿到歲除

石橋執經予最少十年同社夜臺多西州便是香
河水荒草頻添駐馬坡

牢之似舅真何似賓主錢劉韻事矜十月相思烏
相樹濃油高撥勘書燈

諸敏菴彈平調琵琶手法特妙無和之者

感賦長句

近代四絃誰第一野乘虛傳查八十能操北調變
清鐘前有短朱後矇鐵二子神理苦未超鷓皮玉
撥矜兒曹紫花扎扎白翎雀聽風有耳臨官橋高
宮入破無繁徵楓香一拍崑崙死雙彈重按海東

青邊關略犯河滿子蘆管角角鷄登木胡撥嘈嘈
怪鳥啄輕攏慢撚得餘閒猶截紅牙整巾束葉兒
猶惡笑揚州官筵粉墨雜啁啾套數空翻村衙鼓
晚風不唱十三樓錦堂壁月荒煙冷隋唐宮調無
人省羣看輪手拂檀槽四座蒼蒼亂花影

題畫有感

蘆花楓葉誰能咏落木飛鴻漫乞詩一段寒江魚
網水空簾看到日斜時
布帆穩壓玲瓏去更畫茅堂不着人綠浪紅塵加
一等只應閒處辦閒身

格是欲歸歸未得還堪作想想難憑平生下筆持
公論千古風流張季鷹

贈武元樸

齡儀測驗雜諸家節氣平分較歲差說與尋常推
筭子何曾熒惑在匏瓜
菊花爛賤滿城開博帶披綿塞巷來更要與君論
食料皖江須趁米船回

觀奕口占和漁村

短日圍碁不滿盤墨雲冰壑對生寒女兒香苦胎
茶釀賺得王郎側帽看

謂積薪

閉門劬菜足生涯坐隱東軒未較差堪笑孤山老
處士閒情只許賦梅花

後陶說林和靖事為笑

凍柳聊蕭卷旆旖滎陽未北我先知塵沙劫後仙
機盡正是鳴鐘息脇時

聖初戒子早卧

看西廊秋葉

石莧經秋艷婆娑葉一廳絢如張綵帕荒似蔽山
町片片防蟲字枝枝簇鳳翎坡陀看愈好夕照若
為停

荒庭堪鬪草令節罷尋花狡獪逢青女新鮮割絳
霞錦窩人易嬾霜候雁頻差無事論貞脆寒山幾

輜車

夢遊吾谷樹醒倚錫泉楓詩境幻相對秋光真不
同掃除文牒障徙倚菜畦風頤老丹砂色他年鶴
髮翁

矮窗塵壓額高處望如林沒骨時髦手拈鬚老大
心自能頽醉頰所在急疎砧采遍東籬菊黃花點
點金

戲題李萊嵩使君新舫

駑駘伏櫪空悲老舡艦聯檣獨咏新能事軒窗得
深穩折腰容爾看山人

柔櫓嘔呀呶復咍漫誇金翅蔽江開
儻父何堪洗脚入孟婆未怕打頭來

黃花綠麥畫難描一葉輕帆五兩潮
何許金閨折楊柳隨風掠過秦娘橋

經郊城從行摘柿偶述

槭槭寒林靜霜紅郊子城稔年餘
木實窪地喜天晴立馬看新摘
論錢計滿籬空嗟小園樹防護到
諸嬰

過沂水有懷芷園弟

培塿皆全岱旌旄望屬車
龜蒙森蔽翳梁父意何

如寒事顓臾早征軺
沂水初西風正驅雁回首益
躊躇

九月七日蒙陰曉發

漸覺忘生日雲山亂眼前
壺觴聊自屬痰疾可同

湔時方病起天色微沾雨林香
緩著鞭出門青草路馬

齒又三年

過溪

亂石蒼山口清溪十里遙
居人寒不涉落葉自成
橋去去空塵轍行行急
暮飈曾爲五湖長沙鳥漫
相驕

聞杜漁村述方逸巢近况即和膝齋詩奉

柬

客喻維摩病新移廡下齋自題方丈小不隘百千
偕是痛非真臂因嬉罄老懷城南諸酒伴無復醉
冠釵

逸巢讀是痛非真臂句作詩見荅復和一

首

托體爲君臂痠觸處真尚誇能草檄詎歎不如
人歲月柳生肘江湖魚脫綸相忘自相得勿藥試
舒伸

廳前紅梅初開折一枝寄子猷索詩

晴簷鳥雀譁梅著一分花便信寄春去閒中知體
佳軍持涉江水綈几達晨衙試擬凌風態詩情可
較差

耦長索題行卷

詩憶宣城派梅家畫可師品題多雅健墨瀋入荒
竒故國仍烏帽寒齋共白髭江風坐蕭瑟遠媿彥
升兒

西軒

西軒爽塏勝東軒門逕微嫌晉接煩我亦習常殊

不爾遶林山鳥寂無言

卧病經旬萬慮疎鵲鱸塵尾悉蠲除苦難一事貽

兒笑上口清晨誦藥書

匝月陰蒙始放晴柳條乙乙草縱橫何難盡遣箏

琶手淨眼看花破死生

支俸金鑄酒鎗一枚寄二弟生辰

自作銀鎗一尺圍嘉量伯仲素無微比聞飲噉君

常健聊伴書函使欲歸三品全家增舊祿近蒙恩擢階正三品食俸

百花同日著新緋生辰同花生日瀕行復憶前時笑皓首雲

山願莫違

別時曾述宋子京開元寺語為笑

引鏡謝客

斯人病且癯漸白數莖鬚形體看衰始風花覺致

殊煙波情亦淡塵海路常紆孰耐支吾老燕南宅

一區

聞靜夫傷臂口占二詩慰之

偶然成缺陷七粵改前持誰贈千金藥空哦五字

詩角巾同一墊衣被久重池時悼亡未久偈仄人間世道

遙未有期

流觀山海後跂足咏荆軻骭髀披圖悞因展畫致傷風流

墮馬多神來須醉會痛定紀勞歌試筮蒼筤竹而

今脫斧柯

送朱林修北試

經義兼詞賦科條孰後先果聞需實學於此勵時
賢緩酌揚州酒高牽上水船雲霄隨意去老鶻豈
空拳

棟亭詩鈔目錄

卷四

中秋西堂待月寄懷子猷及諸同人

同人分曹劇飲拇戰連北期靜夫不至更訂
飲期戲爲韻語邀之

藥後除食忌謝方南董饋鮓雞二品時將有

京江之行

宿龍潭定水菴閱案上華嚴有感題壁

金山圍爐話次凌虛僧見予句有喜色作此
示之

西軒大雪餅中紅梅盛開憶去年寄子猷詩
感而有作

聞孫冷齋有琴來閣看雪詩率和代東兼念
子猷

宿華陽

和毛會侯席上初食鮓魚韻

惠山納涼歌

入靈谷寺

蒼翠菴看梅

穀日西軒燕集

戲題西軒草木

即事

辛巳孟夏江寧使院鶴舫先生出張見陽臨
米元暉五州煙雨圖徧示坐客命題漫成
三斷句

兩夕隅懷桐臯僧走筆得二十韻却寄

贈卜者楊老

病目初愈思與書宣小飲時軒前玉蘭將開
寄題顧書宣編修踞酒石

送楊公漢歸浮槎

送奕師張崇輝南遊

和孫子魚食齋詩寄二弟

送施潯江方伯之任湖南

施潯江和詩留別兼餉荔枝酒作此志謝

題王南村副使風木圖

西軒賦送南村還京兼懷安侯姊丈冲谷四

兄時安侯同選

荅江村高學士時方求櫟園藏畫

題電巖塔影樓

潯江以夜坐詩見寄兼餉武夸茶

題胡靜夫藏僧漸江畫

題樸仙畫五毒圖

再題

病起弄筆戲書

讀洪昉思稗畦行卷感贈一首兼寄趙秋谷

贊善

咏軒前秋竹

渭符姪過慰有作時頌 詔入閩恩許還家

上塚便道至白下

戲題王安節畫

題姚後陶比丘小像

毘陵舟中雪霽

廊前手植玉蘭盛開同人讌賞無詩自題一首

又題

玉蘭開殘題一截句

二月廿四日大雪戲東靜夫逸巢二老聞連

日出門看花

和冷齋西軒玉蘭原韻

時冷齋有弄璋之喜

竹村大理寄洋茶滇茶二本置西軒中花開

索詩漫題二首

觀陸史臨倪高士畫戲見陽

和耦長西堂坐雨

讀葛莊詩有感即韻賦送劉玉衡觀察歸涿

鹿兼懷朗崖李公

時時乃二弟同行

句容館驛

不寐

橫林逆風口號

荅顧培山見嘲

舟中望惠山舉酒調培山

過無錫賣茶器處

虎丘僧軒坐雨遲培山未至漫成

歸舟和培山見荅韻

泊舟錫山晚游泉上

時大水平堤
屢涉始達

明日復至泉上題一斷句

過祈澤寺與培山並輿行三十里

淳化鎮

夜坐限螢字

夜飲和培山眼鏡歌

時方鈔
說字

硯山歌

黃山松歌

和培
山韻

琴塲歌

題畫綉毬花

題柳村墨杏花

蠅

蚊

蚤

蟻

蝸牛

送培山之鹿城

月下和吳秋屏韻

洗桐

墨蘭歌

爲見陽太守賦見陽
每畫蘭必書容若詞

孟秋偕靜夫子魚尊五殷六過雞鳴寺得詩

三首

棟亭詩鈔卷四

千山曹寅子清謨

中秋西堂待月寄懷子猷及諸同人

涼風萬里騎蟾背汗漫誰遊碧落間濁世陰霾難
久障幻人梯棧強高攀空香灑路飄絲雨重穀流
雲裊珮環直待滿城絃管歇漸分清影上屏山
雲罅寒光瀉水明揚箕浥斗正西行廣庭柳起傜
傜舞深巷雞驚喔喔鳴間夜相看如曠別幾人同
寤亦深情不知風雨長淮岸拍枕波濤何限聲
同人分曹劇飲拇戰連北期靜夫不至更

訂飲期戲為韻語邀之

湖海料人惟有酒，拇戰連番矜好手。胡公健者身，獨藏怕脫兜。螯驚老醜花枝苦，乏喝盞輩所習揚。解兼贊侑碧海鯨，喏未稱奇均堂味。濡曾誰疚事去空，興廣武歎疑成盡。作街亭走一鼓，何難卷白波。三北竟悞占車右，堙井夸竈尚可圖。來朝急駕母宿留。

藥後除食忌，謝方南董饋鮓雞二品。時將有京江之行。

藥餌經冬厭笋蔬，每看良食憶鯖餘。耐寒時欲存，鳧臞躁擾疇堪議。蟹胥百嗜不如雙，跖美頻年自愧一。坭虛臨堦檢點饗，恒足仍欠鴟夸挂屬車。宿龍潭定水菴，閱案上華嚴有感題壁。

僕馬江南岸，間關煙火遲。望中生住想，歇去覺閒癡。敗葉風輪轉，空山雨點知。十年方一瞬，飯後且吟詩。

金山圍爐話次，凌虛僧見予句，有喜色作此示之。

瓦閣雪融處，寒江聲悄然。偶拈一箇字，似勘五宗禪。

時與法乳和尚話三峰事

刻畫難求是精微，次入玄行持無間。

念把筆已多年

西軒大雪餅中紅梅盛開憶去年寄子猷

詩感而有作

折贈非無賴東風用意偏為誰
頰注頰一笑雪漫天小盞澆寒
退疎香致語前莫嫌丰度冷喜
色自今年

聞孫冷齋有琴來閣看雪詩
率和代東兼

念子猷

朔雪殘冬盛河流凍復艚望風
艱磬欬醜酒祝亭臯貧悉家居
穩寒爭眼界高西軒亦清絕揮
涕手

頻勞

寂歷誰同賞寰區意向闌忽開
孤嶂曉獨坐白雲寒琴有移情
悟詩工聚景難因君乞三筆裂
取畫圖看

宿華陽

多年嬾慢水曹郎輒為寒梅辦
急裝詩思灞橋驢背上春風畫
牒虎山傍光福橋名大茅晴雪
臨初舍澤國重裘類朔方最是
衰脾慵早起不堪蓐食徧津

梁

和毛會侯席上初食鮓魚韻

婪尾花殘水驛忙晚庭清蔭食單涼乍傳野市和
鱗法未敵豪家醒酒方昌鼠黃華爭臭味伊魴洛
鯉貴牛羊餽饌亦恨同羗製愁拌紅糟抑鮓嘗

惠山納涼歌

柳上一蟬鳴不已柳下迴風激流水老僧掃石待
清眠勸客睡心先睡耳我耳初離市朝語喜聽清
商變繁徵九龍會意散煙鬟傅翠揚輦三十里詎
識塵埃襪襪子机砧炙熱爭餘滓面具衣裝弄假
人號是裸民應未恥張腋無汗顙無泚前山落日
波純紫臨風叩齒漱寒泉今夜移舟太湖尾

入靈谷寺

香臺漠漠世間塵玉殿空山有比鄰五里蒼寒共
雲霧百年王氣自嶙峋馬塋酹客穿陵隧鴨脚干
霄逼相輪我亦倦遊同苦行鐘聲頻警出坡人

蒼翠菴看梅

經年不浪出孤策自逍遙野寺彌春旭清霜濕半
橋護垣叢竹老念佛炷香銷闔戶無塵迹繁紅太
寂寥

蓓蕾迎年破雙株隔院開氣先正月雨綠厚一身
苔難老成佳匹空香合笑胎幽棲還琢煉須趁月

明來

穀日西軒燕集

上春八日喜春晴屋角梅枝照夜明官况陳年成
長物酒讐連席奮疲兵山香舞就寒蟾色笑語喧
於畫鼓聲但嗜糟醅屬吾黨未妨滅燭絕冠纓

戲題西軒草木

螺女棲香入露叢鼠姑含孕怯春風飄來柳眼疑
全笑覺後梨雲夢已空
夾路蕪菁敗素鮮薔薇削弱不成妍甘蕉葉大戎
葵醜或有山榴似火燃

即事

炭渚楊花霽淞飛瓜洲雲日弄霏微年年三翼乘
潮去趙趙迎人晾酒衣

二分明月揚州夢一樹垂楊四百橋斟酌斷腸無
日了柁樓閑坐譜瓊簫

辛巳孟夏江寧使院鶴舫先生出張見陽

臨米元暉五州煙雨圖徧示坐客命題

漫成三斷句

山雲濛瀟樹無根元氣淋漓不可捫欲鬪虎兒扛
鼎力祗應墨法識真源

騰蛇無足鼯多趾已覺風流過漢陽我亦蹒跚負
竒癖短衣徒手逐黃麀

百年文酒西軒會素領蒼顏半座中顧盼獨誰東
向笑五州煙雨片帆風

時崔舫
將東歸

雨夕偶懷桐臯僧走筆得二十韻却寄

晚衙鼓鼙鼙簿牒清擾擾佩筆二十年畫字苦不
了墨猪負躑躅歌雅亂潦草有時自不識從吏紛
絕倒焉知唐與晉甲乙過酉卯阿師伽黎秀慎墨
如秘寶貽我兩卷書屈強逼坡老崩崖落絕石渴
驥破閑阜妍媸笑相形波脚競研討往往透紙背

逸氣振羣槁小詩亦有法立論復佼佼名根縛枯
寂慧業障煩攪宵來無夢睡微雨徧叢篠灑然耳
目異頓覺茶蔬飽不知修持中何行具此好千秋
磐陀石潮汐應胸眺梵夾一日歸擔簦入幽窅修
江結重雲危帆迅飛鳥流滯江東宦寤擗空堂曉
徒撚木榘子碌碌鏗指爪

贈卜者楊老

楊老性淳慤拱揖類童子靈光寄槁木矢口決生
死間跨秃尾驢緩曳歌芒屣樂稱太守賢不歎云
何里原麤飽餽粥秋林盛茂翫行歌拾蕨卵遠釣

灑湖水通人奚足方勞矣執鞭士

病目初愈思與書宣小飲時軒前玉蘭將

開

絮帽風寒九九晴辛夸花發近清明半春眼苦黃
連暗數日皆閑碧蘚生欲摘瓊枝邀夜坐共看光
彩化雲英楚江鼓枻中流去暫滯應無隔宿程

寄題顧書宣編修踞酒石

君家石好我未見顛窵洞窅詩得之波淘浪激歷
人代豈有爪目鱗之而橫理庚庚地骨坼呀呀大
口開天池頑荒一剖絕無用興雲出雨騰蛟螭吾

生有癖亦嗜此大車稠載羅堦墀經營位置每終
日賓客雜坐兒童嬉君今好同百不異剝落苔蘚
含糟醅汗尊杯飲學上古脫略冠帶當欽寄松風
一覺偶然耳海內傳賞瓊琚詞君不見揚州法釀
春江色升斗誰能遂浮拍玉堂窅窅天門深他日
者思踞孱顏不可得

送楊公漢歸浮槎

一秋肺熱苦耽茶草草重陽就菊花歸去雙匏好
封寄西軒泉品缺浮槎
稻香樓近棗香村天壤名成一飽溫游藝莫言徒

鄙事也憑悔吝教兒孫

送奕師張崇輝南遊

湫居已足除風雨湖海今將續舊遊岸幘何門稱
上客揮毫一賦即名流王郎馬鬣原無敵張子心
兵不外求試把青鞋安頓處每逢便信寄昇州

和孫子魚食薺詩寄二弟

野薺蒙霜雪能先衆草生賦形同薪萁聚族異蕪
菁肉食甘常勝山厨品最清異鄉頻舉筋糝對
梅英

沙鉢窮家活皇天茁此徒青青隨麥隴濟濟困泥

塗覓陸時消長豉鹽乍有無平生舖餽意未改茹

園茶

送施潯江方伯之任湖南

三年卓筆賦黃樓期建高牙過石頭酒熟一時渾
浪語旌麾果喜見前驕嚮飲彭城署中劉孟倬連擢山左曾以此期潯江今果然矣保

釐藍縷功非細開拓窮荒慮必周何限吳民截鞭

鐙潯江去已七年百姓愛戴不衰稍因風雨暫淹留

施潯江和詩留別兼餉荔枝酒作此志謝

誰拈重碧擘輕紅萬里春隨舫舶風方物常年隨
職貢郵籤第一接詩筒可憐口腹知吾嗜聊遣離

愁對使空斟酌色香渾未改簷花狼籍晚煙中

題王南村副使風木圖

風木吟何限杯園屬孝思窮年護丘壠黦墨變松
茨破散傷游子清明摘柳枝披圖良觸迂日暮更
深悲

西軒賦送南村還京兼懷安侯姊丈冲谷

四兄時安侯同選

宦遊常苦累食指徧天涯朱紱聊通隱青瑣盡挈
家計程除目美遶道出京斜舒卷層霄內風雲望
眼賒

愁坐懷親串空軒結想初連鑣雙使節上塚一迴
車墟里寒泉在蠻音稚子餘南村饒樂事早晚報
緘書

溷水不可釣松茨聞欲荒春風苦棟樹夜雨讀書
牀骨肉論文少公私拂紙長頻煩達聲口努力學
農桑

答江村高學士時方求櫟園藏書

遠訊青溪使秋來兩發函間時成契濶即事避趁
趨同喜高堂健頻分賜饌甘巖廊殊未已堅卧恐
難堪

廿載郎官舊追陪
扈聖遊辭榮見疏
廣踐迹問羊求好
作歸田錄真乘泛
海舟樵風如有意
指點近沙洲

在昔論書畫風流
獨大梁癖非端近
代貧已困諸郎竟
脫珊瑚網今登玳
瑁牀如君真不朽
識跋幸加詳

題電巖塔影樓

禪居無異見塔影
入窗新晰喻琉璃
似搏空凸凹真鳥
來疑倒挂雲滅想
因塵欲示諸天趣
還同晏坐身

潯江以夜坐詩見寄兼餉武夸茶

端居無喧寂廓然
神自來因誰結情
語亭角梅花開梅
花如幽人笑破胭
脂腮昨歲冰凌憎
今歲雪皜皜陽和
會有待且願撥寒
醅

北源恒苦俗松蘿
不同器武夸真仙
人陽羨近名士此
評出高陽恐犯玉
川忌多君致紫芽
滌我塵土胃閉門
謝諸賓斟酌窮水
味

題胡靜夫藏僧漸江畫

逸氣雲林遜作家
老憑閒手種梅花
吉光片羽休輕覩
曾敵梁園玉畫叉

周槃園藏畫以缺漸江者為恨
漸江老喜種梅號梅花和尚

神隱曾題撲仙畫五毒圖

南蟲毒頭北蟲尾餘蟲蘊毒隨方止含牙濡吻各有營此物不生造物死不聿追形毒厭毒夜簷白鳥啾啾哭醉鄉廣大歸去來涼風共倚堦前竹

再題

跂跂胍胍善緣壁即且甘帶鼃羅織老蟄蟠腹不避人蠱尾爬沙白晝出五蟲鎮惡世所傳裸蟲更毒生其間朱天長養豈無意南華只解夔憐虻流鈴八衢火萬里入手騷除心得已鳳毛麟角安在哉紫茸銀艾空披靡

病起弄筆戲書

不恨不如王右軍但恨羲之不見我健兒黥面作真王世上英雄寧有夥鮪生腸無一勺油矢口便罵東諸侯古人是誰我不識可憐命意同黔婁人生倔強無終極君不見蜣郎轉丸蜂窠蜜

讀洪昉思稗畦行卷感贈一首兼寄趙秋

谷贊善

惆悵江關白髮生斷雲零雁各淒清稱心歲月荒唐過垂老文章恐懼成禮法誰嘗輕阮籍窮愁天亦厚虞卿縱橫揮闔人間世只此能消萬古情

咏軒前秋竹

秋竹碧參差行根得雨遲節長疑畫粉梢重亂垂
枝鄰壁收寒影荒齋補舊茨祇緣藥闌處曾見土
萌時

渭符姪過慰有作時頌

詔入闈恩許還

家上塚便道至白下

王程秋欲邁間道子重過多難懷蘭訊高眠共竹
柯慎言温室樹嘉遯碧山阿草草瞻家慶還如淚
眼何

戲題王安節畫

四分茅亭寄四鄰兩株散木不堪薪風泉浩浩無
虛日但起詩情是俗人
黯澹都成搦管愁水容山骨兩禁秋尋常不覺西
風惡纔聳吟肩葉打頭

題姚後陶比丘小像

香海橫流事特奇盤陀安隱勝須彌猛風不動袈
裟角彈指闍浮小劫移
麻麥閑情底用愁見前衰瑞總風流伽黎不挂原
無相慚愧諸龍乞裏頭

毘陵舟中雪霽

寒雨淹旬不肯晴
毘陵夜雪坎軻平
晨窗旋啓飛花入
卯酒微醺坐盹成
蓬暗麝煤尋舊迹
檣舒鴉喜變新聲
丁年綠水紅亭路
誰記璩璋載鶴行

廊前手植玉蘭盛
開同人讌賞無詩自題

一首

西院辛夸高數尋
鉤簾惟見玉森森
日長清影滿
髹几客至臨風揮
素琴蓬鬢忍青頑
不改苔堦凝
綠晚相侵
苦吟情味應難到
多被晴香觸迥深

植此

已十年

又題

自署頑仙守閬風
天門詖蕩日輪東
依稀夢裏朝元路
十萬瑤簪玉色同

玉蘭開殘題一截句

芝蓋夜游玄圃雪
寶燈晨焰畫堂風
人間花片空狼籍
好是離披想像中

二月廿四日大雪戲柬靜夫逸巢二老聞

連日出門看花

風捲江雲墮鶴毛
竹鑪新火熨重袍
半青半白覆簷柳
乍笑乍啼當戶挑
造物如春愁爛熳
酒杯由客謾操勞
北山拄杖西城屐
何處登臨吟最高

和冷齋西軒玉蘭原韻

時冷齋有
弄璋之喜

十步輪囷影錯連三株手植自當年
花開快雪時晴後林立官奴玉潤前
每愛清光能映字不煎濃
萍可忘眠摩挲老眼幽窗下恣看藍田日午煙

竹村大理寄洋茶滇茶二本置西軒中花

開索詩漫題二首

瑤島春寒碧纈衣馬嵬塵土踐楊妃

本地單瓣者呼為
楊妃山茶開易謝

千金笑鬪吳宮草八繭愁荒織女機
膩眼新晴披綽約歌牀清賞入精微
由來子墨輕標榜玉茗風流絕世稀

筑紫金沙萬里春滇花開並海紅
新幽齋不著曼陀雨寶靨誰培
靺鞨塵麗宇綺羅紛照耀欲光蜂
蝶損精神漫山百卉無邊幅裁翦
東風恐未勻

觀陸史臨倪高士畫戲見陽

柳外斑駁繫夕曛練香衙屋靜氤氳
清泉白石聊

供具老枿幽篁幸割分畫苑全家遺
侍史

趙文敏全家
善畫而獨無

侍詞場一隊掩孤軍可知解咏蒲萄
後纏糊橄弓

更軼羣

和耦長西堂坐雨

好雨不期至霽霖愁過時開窗對梧
柳決溜聞溝

池浮淖乘軒少紆塗委巷爲思君極疎懶來往未
嫌遲

讀葛莊詩有感即韻賦送劉玉衡觀察歸

涿鹿兼懷朗崖李公

時峙乃二弟同行

衰病叨陪侍從臣掉頭空羨耦耕身故家喬木今
誰在永日殘碁局更新督亢陂連涑谷水軍都山
接大房春比鄰桑柘添幽興北道明年問主人

句容館驛

野樹出檐長庭鴉哺乳忙胥徒復傳舍窳堵尚斜
陽行馬非殊貴顛毛旣自傷尋常棲息地不敢正

居牀

余十七歲侍先公宿此今來往三十年矣

不寐

惡馬踣鐵蹄破櫪如斧門飢蝥鼓長喙哀鳴徹耳
根二物憤一食詎識寃與恩鞭箠雜緣撲中夜聲
喧喧呼兒晰其理躡嚙難遽論千里有反莖弱肉
無孱魂蟲畜苟知分世運寧遭屯志士甘藜藿固
窮道乃尊小人逐肥甘動輒遭笞髡驅策事可已
一笑回晏溫推枕不能寐膏火荒庭昏

橫林逆風口號

好風不借天隨子船尾茶煙怕倒吹破曉吳波轉

清脆釣筒收得小魚兒

荅顧培山見嘲

黃塵埽塢馬蹄劓五月誰披白苧衫老去心情非
見獵逆風正喜未張颿

舟中望惠山舉酒調培山

羣山東行不滿眼遙對九龍傾一盞知君夙昔結
山緣吐語調君雙頰莞望山不見石不知山骨清
宿山不飲水不知山氣靈三山五嶽渺何許雲煙
汗漫空冷辨常嗤俗世子吮筆輒求似君胡三覲
面不肯留隻字我能爲君作先容山靈假汝歸來

風蔣家酒樓堪憇脚十日醉倒青芙蓉支硎山虎
丘寺波瀾瀾石齒齒及雨旣佳晴復美況踏龍頭
跨龍尾盥漱名泉伐毛髓放眼憑凌太湖水君如
不遊他日悔

過無錫賣茶器處

白石垂楊岸香泥燕子家春歸如昨日茶興滿天
涯

虎丘僧軒坐雨遲培山未至漫成

東巖礧壑憑臨高風雨橫絕懸驚濤翠蘚連窗走
鼯鼠頽煙壓樹啼韓臯欲尋幽境挂瓢笠直上石

梁窺桔槔坐久瓦餅聲嘖嘖詩成一噓布吹毛
歸舟和培山見荅韻

東南溯歸舟丘壑厭名勝感茲風雨交得暢魚鳥
性軒蓋來無時盛事每難併躍躍手中藤牽我破
苔磴初疑俯鮫宮恍惚失庭徑碧陰盪流潦蕭索
滿孤聽應有飛空仙不樂四禪靜瀾翻劍池水一
洗箏琶興楚妃屏膏沐越女亂粧靚重結聯臂游
獨顧惜泥濘

泊舟錫山晚游泉上

時大水平堤
屢涉始達

白波吹影見巉巖半日靈風已卸颿尚許徒扛容

不借豈煩開道荷長鏡平生慣帶游山雨對客恒
披浣酒衫向晚泉聲偏聒耳亂雲層石草多

明日復至泉上題一斷句

空欄嘿坐數漚珠轉入渟泓澹欲無雨後不曾添
七勺一規清影射眉鬚

過祈澤寺與培山並輿行三十里

夢中祈澤寺泉韻澹襟裾古木無亭障涼風昇竹
輿渾忘塵鞅累相賞黑甜餘不必啼山鳥詩人在
副車

淳化鎮

綠樹連村響麥耜井泉無嫌飯無砂消搖慣熟山
園路開徧蕞荷向午花

夜坐限螢字

夜久覺無露層霄微隱星暗涼通井澤聯坐度風
螢祇作菰蘆語旁䟽耒耜經吾人常不襪箕踞已
忘形

夜飲和培山眼鏡歌

時方鈔
說字

銅盤磨雲光綴綴晶瑩刻得棘端刺白頭巾箱何
所爲便便已飽五經笥殘年眇淚如撒沙漫空赤
暈生狂花琉璃自信眼根見靨黷豈尚工倕夸生

人六鑿宜藏用五官首出司明重電光一抹寧再
來兩睂秋水搖春夢追曉寓碗世玩多蛛絲倒影
成擘窠堆案還愁束帶熱等身其奈操觚何六義
精嚴神不滅萬象芸芸親手澤指穿腕脫敢云勞
墨華直灑心苗血塗朱抹碧妄男子涅烏拔白真
羞死雙環奉君君志矢吾衰抽筆猶堪此與君半
百皆稱翁花襠荻戟頗憶嬉庭中羲和縱轡肯相
待會鼓猛氣驚盲聾移家定載三十乘請君覆酌
乾千鍾

硯山歌

泗濱浮磬久不採真陽貢石聞前明雲根鏤鏡脫
斧鋸百年拳塊藏真形此山云自樵夫得褐裏入
市易斗升泰西郭髯持贈我十硯陪列如排星按
圖絕似小岱嶽背腹渾厚無鋒稜胡桃紋深卧沙
遠中函圭竇通空靈雨晨微潤淺蒼色犀椎試扣
生銅聲晏然股脚妙跌坐畫師竒澹愁天成平生
身外寡長物齟齬却掃當風櫺獨此移人勝珠玉
恐縮大地浮蓬瀛襄陽牙僧笑齒冷仇池夢覺歸
青冥雄文誰能壓百怪墨海灑浪飛煙驚束錦重
緹待好手品跋轉憶雲間生

董文敏跋米
石圖語甚妙

黃山松歌

和培
山韻

蒼髯擎空石兀兀落子生根千礧底丹臺一去飽
塵沙偃蹇蚪蟻盤不起擾龍非龍山無山乳毛被
體鱗皴斑煉形恐是古秦女姿韻颯爽浮煙鬢松
乎松乎百昌過時誰復榮何必天都萬仞誇崢嶸
幽齋白日喜長夏自扣枯匏歌隰苓

琴塼歌

鄭州古塼五尺強方花隱起驚鸞翔嶄然廉角不
苦窳口尻哆豁如車箱稗官流傳號琴薦土鼓康
瓠匊宮商甄陶堅緻歎前代應有響屨連雕牆開

元連錢陋穿鑿

見鄭世子墳律呂精義

昭華截管隨弛張縻絲

誰聞九寡珥匏巢空沸千蜩塘坐靡宗祿奉游豫
行唱籤記稱清狂乃知流韻托槁木未若磨礪親
沙塲博兮笑爾不經濟為爾湔滌勤周防 聖朝
聲教被海寓一物不棄包遐荒八窗洞達散煩愠
兒童擊壤歌時康君不見支鐙擘紡有功用猶勝
踐踏拋街坊

題畫綉毬花

瓊枝璧月競風流晉鄭誰知盡白頭道得牆陰殘
雪在清新祇許宋商丘

題柳村墨杏花

勾吳春色自蕞苴多少清霜點鬢華省識女郎全
疋袖百年孤塚葬桃花

蠅

擾擾秋蠅子麾之去復來偷生戀薌滓瀕死活寒
灰捉足時遭侮攢頭枉見猜見北史晨曦在東壁為拓
紙窗開

蚊

豹脚潛無迹還如鬼瞰家孤飛長喋血老喙漫生
花草壤隨方聚焚煙薄市斜蹒跚笑蝙蝠昏黑遶

簷牙

蚤

鴝鵒能捕蚤明察恐無功
方法蒸桃葉竒謀盡火
攻細難驅世外急復處
裨中踴躍無他技終於盤
水窮

蟻

小蟻收瓊粉緜緣滿筭枝
巡行成鳥道斂影絕蛛
絲富驟移封早軍驕敗氣
爲飄搖感風雨狼藉到
堦墀

蝸牛

亦知生事拙獨負一屨游
螺女不相妬哀駘無外
求蘚花崖石古瓜蔓井渠
秋大笑滄溟外青紅漫
結樓

送培山之鹿城

樓角晚霞明清江縱擢行
裝輕黃篋舫詩滿石頭
城舉扇蓉湖曉支筇虎阜
晴滄浪亭下水隨意濯
冠纓

闔閭城上望雲影見崑山
愁思風旌外親情帶水
間移家三換印對月幾開
顏無物酬鄉黨風流溯
往還

月下和吳秋屏韻

月林移短榻復此枕函清毫末無潛照宵中恐太
明極圓初伏尾當午夜號鳴銀漢織阿近西風整
御行

柳絲雖冪冪不礙碧梧陰殘夜荒更轉空簷白月
深目窮冰彩豔手弄井華吟莫結空山想寥寥見
古心

洗桐

庭蕪不翦從吾嬾手課長瓢日洗桐小草旋霑生
意足千花一笑轉頭空兒童運臂成風雨老翠低

簷入幌櫳猶戀石欄歌枕處數聲殘滴似吳篷

墨蘭歌

爲見陽太守賦見陽
每畫蘭必書容若詞

摺扇鄣風花向左鸞飄鳳泊驚婀娜巡枝數朶歎
師承顛倒離披無不可瀟湘第一豈凡情別樣蕭
疎墨有聲可憐側帽樓中客不在薰鑪煙外聽盛
年戚戚愁無謂井華飲處人偏貴錫桃敢信敵千
羊孤芳果亦空羣卉張公健筆妙一時散卓屈寫
幽蘭姿太虛游刃不見紙萬首自跋那蘭詞交渝
金石真能久歲寒何必求三友祇今擺脫松雪肥
竒雅更肖彛齋叟

孟秋偕靜夫子魚尊五殷六過雞鳴寺得
詩三首

遂有尋詩侶青林引興前僧荒太平日地創永康
年香際憑高鳥湖風浴早蓮悠然坐蕭遠煙雨閱
諸天

飈輪飛十代秋草屬前朝聖蛻隨遷化凡情墮寂
寥頽城疑護埭老樹強題蕭洵瀘河沙在能忘爪

髮銷

甲申重過又
三十一年

睡足平生事山窗絕見聞孤筇臨別路萬竹倚斜
曛白業雙林靜青溪一曲分應披精進鎧長此却

魔軍

靜夫云苦耽
故有末句



